

四庫全書

史部

欽定四庫全書

史記卷四十二

漢 太 史

令司馬遷 撰

宋中郎外兵曹參 軍裴 駟集解

唐國子博士弘文館學士司馬貞索隱

唐諸王侍讀率府長史張守節正義

鄭世家第十二

鄭桓公友者周厲王少子而宣王庶弟也

集解徐廣曰
年表云母弟

宣王立二十二年友初封于鄭

索隱鄭縣名屬京兆秦武公十一年初縣杜鄭

是也又系本云桓公居棧林徙拾宋忠云棧林與拾皆舊地名是封桓公乃名為鄭耳至秦之縣鄭是鄭武公東徙新鄭之後其舊鄭乃是故都故秦始改為縣也出地理志封三十三歲百姓皆便

愛之幽王以為司徒

集解韋昭曰幽王八年為司徒索隱韋昭據國語以為說耳

和

集周民周民皆說河雒之間人便思之為司徒一歲幽王以褒后故王室治多邪諸侯或畔之於是桓公問太

史伯

集解虞翻曰周大史

曰王室多故予安逃死乎太史伯對曰

獨雒之東土河濟之南可居公曰何以對曰地近虢鄆

集解徐廣曰虢在成臯鄆在密縣駟案虞翻曰虢姬姓東虢也鄆妘姓正義括地志云洛州汜水縣古東虢叔之國東虢君也又云故鄆城在鄆州新鄆縣東北三十三里虢鄆之君貪而好利索隱

鄭語云虢叔恃勢鄆仲恃險皆有驕侈又加百姓不附之以貪冒是也虢叔文王弟鄆妘姓之國也

今公為司徒民皆愛公公誠請居之虢鄆之君見公方

用事輕分公地公誠居之虢鄆之民皆公之民也公曰

吾欲南之江上何如對曰昔祝融為高辛氏火正其功

大矣而其於周末有興者楚其後也周衰楚必興興非

鄭之利也公曰吾欲居西方何如索隱國語曰公曰謝西之九州何如韋昭

曰謝申伯之國謝西有九州二千五百家為州其說蓋異此

對曰其民貪而好利難

久居公曰周衰何國興者對曰齊秦晉楚乎夫齊姜姓

伯夷之後也伯夷佐堯典禮秦嬴姓伯翳之後也伯翳

佐舜懷柔百物及楚之先皆嘗有功於天下而周武王

克紂後成王封叔虞于唐

集解徐廣曰晉世家曰唐叔虞姓姬氏字子干索隱唐者

古國堯之後其君曰叔虞何以知然據此系家下文云唐人之季代曰唐叔虞當武王邑姜方動大叔夢天帝命而子曰虞與之唐及生有文在手曰虞遂以名之及武王滅唐而國大叔故因以稱唐叔虞杜預亦曰取唐君之名其地阻險以此有德與周衰並亦必興矣桓公是也

曰善於是卒言王東徙其民雒東而虢郟果獻十邑

集解

虞翻曰十邑謂虢郟鄆蔽補丹依睢歷莘也索隱國語云太史伯曰若克二邑鄆蔽補丹依睢歷莘君之土也

虞翻註皆依國語為說

竟國之

集解韋昭曰後武公竟取十二邑地而居之今河南新鄭也

二歲

犬戎殺幽王於驪山下并殺桓公鄭人共立其子掘突

正義上求勿反下戶骨反

是為武公

索隱譙周云名突滑皆非也蓋古史失其名太史公循舊失而

妄記之耳何以知其然者按下文其孫昭公名忽厲公名突豈有孫與祖同名乎當是舊史雜記昭厲忽突之

名遂誤以掘突為武公之字耳

武公十年娶申侯女

正義括地志云故申城在鄆州南陽

縣北三十里左傳云鄭武公取於申也

為夫人曰武姜生太子寤生生之

難及生夫人弗愛後生少子叔段段生易夫人愛之

集解

徐廣曰年表云十四年生寤生十七年生太叔段

二十七年武公疾夫人請公

欲立段為太子公弗聽是歲武公卒寤生立是為莊公

莊公元年封弟段於京

集解賈逵曰京鄭都邑杜預曰今滎陽京縣

號太叔

祭仲曰京大於國非所以封庶也莊公曰武姜欲之我

弗敢奪也段至京繕治甲兵與其母武姜謀襲鄭二十

二年段果襲鄭武姜為內應莊公發兵伐段段走伐京

京人畔段段出走

集解杜預曰鄆今鄆陵也正義鄆音烏古反今新鄭縣南鄆頭有村

多萬家
舊作鄆

鄆潰段出奔共

集解賈逵曰共國名也杜預曰今汲郡共縣也正義按今衛州

共城縣

於是莊公遷其母武姜於城潁

集解賈逵曰鄭地也正義疑許

州臨潁
縣是也

誓言曰不至黃泉

集解服虔曰天玄地黃泉在地中故言黃泉

黃泉 母相

見也居歲餘已悔思母潁谷之考叔

集解賈逵曰潁谷鄭地正義括地志

云潁水源出洛州嵩高縣東南三十里陽乾山今俗名潁山泉源出山之東谷其側有古人居處俗名為潁墟

故老云是潁考叔故居即有獻於公公賜食考叔曰臣

有母請君食賜臣母莊公曰我甚思母惡負盟奈何考

叔曰穿地至黃泉則相見矣於是遂從之見母二十四

年宋繆公卒公子馮奔鄭鄭侵周地取禾

索隱左傳隱二年鄭武公

莊公為平王卿士王貳于虢及王崩周人將畀虢公政夏四月鄭祭足帥師取溫之麥秋又取成周之禾二

十五年衛州吁弑其君桓公自立與宋伐鄭以馮故也

二十七年始朝周桓王桓王怒其取禾弗禮也

索隱杜預曰桓

公即位周鄭交惡至是始朝故言始也左傳又曰周桓公言於王曰我周之東遷晉鄭馬依善鄭以勸來者猶懼不說况不禮馬鄭不來矣二十九年莊公怒周弗禮與魯易祊許

田索隱許田近許之地魯朝宿之邑祊者鄭所受助祭太山之湯沐邑鄭以天子不能巡守故以祊易許田

各從三十三年宋殺孔父三十七年莊公不朝周周桓其近

王率陳蔡號衛伐鄭莊公與祭仲高渠彌發兵自救

索隱

左傳稱祭仲足蓋祭是邑其人名仲字仲足故傳云祭封人中足是也此縑葛之戰在魯桓五年彌作昧並音

迷

王師大敗祝瞻射中王臂

索隱左氏作祝聃

祝瞻請從之鄭

伯止之曰犯長且難之況敢陵天子乎乃止夜令祭仲

問王疾三十八年北戎伐齊齊使求救鄭遣太子忽將

兵救齊齊釐公欲妻之忽謝曰我小國非齊敵也時祭

仲與俱勸使取之曰君多內寵

集解服虔曰言庶子有寵者多

太子無

大援將不立三公子皆君也所謂三公子者太子忽其

弟突次弟子亶也

索隱此文則數太子忽及突子亶為三而杜預云不數太子以子突子亶

子儀為三蓋得之

四十三年鄭莊公卒初祭仲甚有寵於莊公

莊公使為卿公使娶鄧女生太子忽故祭仲立之是為

昭公莊公又娶宋雍氏女

集解賈逵曰雍氏黃帝之孫媯姓之後為宋大夫

生

厲公突雍氏有寵於宋

集解服虔曰為宋正卿故曰有寵

宋莊公聞祭

仲之立忽乃使人誘召祭仲而執之曰不立突將死亦

執突以求賂焉祭仲許宋與宋盟以突歸立之昭公忽

聞祭仲以宋要立其弟突九月辛亥忽出奔衛己亥突

至鄭立是為厲公厲公四年祭仲專國政厲公患之陰

使其壻雍糾欲殺祭仲

集解賈逵曰雍糾鄭大夫

糾妻祭仲女也知

之謂其母曰父與夫孰親母曰父一而已人盡夫也

集解

杜預曰婦人在室則天父出則天夫女以為疑故母以所生為本解之

女乃告祭仲祭仲

反殺雍糾戮之於市厲公無奈祭仲何怒糾曰謀及婦

人死固宜哉夏厲公出居邊邑櫟

集解宋衷曰今潁川陽翟縣索隱按櫟音

歷即鄭初得十邑之歷也

祭仲迎昭公忽六月乙亥復入鄭即位秋

鄭厲公突因櫟人殺其大夫單伯

集解杜預曰鄭守櫟大夫也索隱依左傳

作檀伯事在桓十五年此文誤為單伯者蓋亦有所因也按魯莊公十四年厲公自櫟侵鄭事與單伯會齊師伐宋相連遂居之諸侯聞厲公出奔伐鄭弗克而去宋故知誤耳

頗子厲公兵自守於櫟鄭以故亦不伐櫟昭公二年自昭公為太子時父莊公欲以高渠彌為卿太子忽惡之莊公弗聽卒用渠彌為卿及昭公即位懼其殺已冬十月辛卯渠彌與昭公出獵射殺昭公於野祭仲與渠彌不敢入厲公乃更立昭公弟子亶為君是為子亶也無謚號子亶元年七月齊襄公會諸侯於首止

集解服虔曰首止近

鄭之地杜預曰首止衛地鄭子亶往會高渠彌相從祭

陳留襄邑縣東南有首鄉仲稱疾不行所以然者子亶自齊襄公為公子之時嘗

會鬪相仇及會諸侯祭仲請子亶無行子亶曰齊彊而

厲公居櫟即不往是率諸侯伐我內厲公我不如往往

何遽必辱且又何至是卒行於是祭仲恐齊並殺之故

稱疾子亶至不謝齊侯齊侯怒遂伏甲而殺子亶高渠

彌亡歸索隱左氏云歸與祭仲謀召子亶弟公子嬰於

陳而立之是為鄭子索隱左氏以鄭子名子是歲齊襄

儀此云嬰蓋別有所見

公使彭生醉拉殺魯桓公鄭子八年齊人管至父等作亂弒其君襄公十二年宋人長萬弒其君湣公鄭祭仲死十四年故鄭亡厲公突在櫟者使人誘劫鄭大夫甫

瑕要以求入

索隱左傳作傳瑕此本多假借亦依字讀

瑕曰舍我我為君殺

鄭子而入君厲公與盟乃舍之六月甲子瑕殺鄭子及其二子而迎厲公突突自櫟復入即位初內蛇與外蛇鬪於鄭南門中內蛇死居六年厲公果復入入而讓其伯父原

索隱左傳謂之原繁

曰我亡國外居伯父無意入我亦甚

矣原曰事君無二心人臣之職也原知罪矣遂自殺厲

公於是謂甫瑕曰子之事君有二心矣遂誅之瑕曰重

德不報誠然哉厲公突後元年齊桓公始霸五年燕衛

與周惠王弟頹伐王

索隱惠王莊王孫僖王子子頹莊王之妾王姚所生事在莊十九年

王出奔溫立弟頹為王六年惠王告急鄭厲公發兵擊

周王子頹弗勝於是與周惠王歸王居于櫟七年春鄭

厲公與虢叔襲殺王子頹而入惠王于周秋厲公卒子

文公踰立

索隱踰音在接反系本文公徙鄭宋忠云即新鄭也

厲公初立四歲

亡居櫟居櫟十七歲復入立七歲與亡凡二十八年文

公十七年齊桓公以兵破蔡遂伐楚至召陵二十四年

文公之賤妾曰燕姑

集解賈逵曰
姑南燕姓

夢天與之蘭

集解賈逵曰香

名曰余為伯僚余爾祖也

集解賈逵曰
伯僚南燕祖

以是為而子

集解

王肅曰以是蘭
也為汝子之名

蘭有國香以夢告文公文公幸之而予

之草蘭為符遂生子名曰蘭三十六年晉公子重耳過

文公弗禮文公弟叔詹曰重耳賢且又同姓窮而過君

不可無禮文公曰諸侯亡公子過者多矣安能盡禮之

詹曰君如弗禮遂殺之弗殺使即反國為鄭憂矣文公

弗聽三十七年春晉公子重耳反國立是為文公秋鄭

入滑滑聽命已而反與衛於是鄭伐滑

索隱左傳僖二十四年鄭公子

士泄堵俞彌帥師伐滑

周襄王使伯獮請滑

索隱獮音服左氏王使伯服游孫伯如鄭

請滑杜預云二子周大知伯獮即伯服也

鄭文公怨惠王之亡在櫟而文

公父厲公入之而惠王不賜厲公爵祿

索隱此言爵祿與左氏說異左

傳云鄭伯享王王以后之擊鑑與之虢公請器王予之爵則爵酒器非爵祿也故曰與左氏說異

又怨

襄王之與衛滑故不聽襄王請而囚伯獮王怒與翟人

伐鄭弗克冬翟攻伐襄王襄王出奔鄭鄭文公居王于
汜三十八年晉文公入襄王成周四十一年助楚擊晉
自晉文公之過無禮故背晉助楚四十三年晉文公與
秦穆公共圍鄭討其助楚攻晉者及文公過時之無禮
也初鄭文公有三夫人寵子五人皆以罪蚤死公怒漑
集解徐廣曰一作瑕逐羣公子子蘭奔晉從晉文公圍
索隱音既左傳作瑕鄭時蘭事晉文公甚謹愛幸之乃私於晉以求入鄭為
太子晉於是欲得叔詹為僇鄭文公恐不敢謂叔詹言

詹聞言於鄭君曰臣謂君君不聽臣晉卒為患然晉所以圍鄭以詹詹死而赦鄭國詹之願也乃自殺鄭人以詹尸與晉晉文公曰必欲一見鄭君辱之而去鄭人患之乃使人私於秦曰破鄭益晉非秦之利也秦兵罷晉文公欲入蘭為太子以告鄭鄭大夫石癸曰吾聞姑姓乃后稷之元妃集解杜預曰姑姓之女為后稷妃其後當有興者子蘭母其後也且夫人子盡已死餘庶子無如蘭賢今圍急晉以為請利孰大焉遂許晉與盟卒而立子蘭為太子

晉兵乃罷去四十五年文公卒子蘭立是為繆公繆公
元年春秦繆公使三將將兵欲襲鄭至滑逢鄭賈人弦
高詐以十二牛勞軍故秦兵不至而還晉敗之於峭初
往年鄭文公之卒也鄭司城繒賀以鄭情賣之秦兵故
來三年鄭發兵從晉伐秦敗秦兵於汪往年集解徐廣曰繆公之
二楚太子商臣弒其父成王代立二十一年與宋華元
伐鄭華元殺羊食士不與其御羊斟怒以馳鄭鄭囚華
元宋贖華元元亦亡去晉使趙穿以兵伐鄭二十二年

鄭繆公卒子夷立是為靈公靈公元年春楚獻鼈於靈

公子家子公將朝靈公

集解賈逵曰二子鄭卿也

子公之食指動

集解

服虔曰第二子

謂子家曰佗日指動必食異物及入見靈公進

鼈羹子公笑曰果然靈公問其笑故具告靈公靈公召

之獨弗予羹子公怒染其指

集解駟案左傳曰染指於鼎

嘗之而出

公怒欲殺子公子公與子家謀先夏弑靈公鄭人欲立

靈公弟去疾去疾讓曰必以賢則去疾不肖必以順則

公子堅長堅者靈公庶弟

集解徐廣曰年表云靈公庶兄

去疾之兄也

於是乃立子堅是為襄公襄公立將盡去繆氏繆氏者
殺靈公子公之族家也去疾曰必去繆氏我將去之乃
止皆以為大夫襄公元年楚怒鄭受宋賂縱華元伐鄭
鄭背楚與晉親五年楚復伐鄭晉來救之六年子家卒
國人復逐其族以其弑靈公也七年鄭與晉盟鄆陵八
年楚莊王以鄭與晉盟來伐圍鄭三月鄭以城降楚楚
王入自皇門鄭襄公肉袒擊羊以迎曰孤不能事邊邑
使君王懷怒以及弊邑孤之罪也敢不惟命是聽君王

遷之江南及以賜諸侯亦唯命是聽若君王不忘厲宣

王桓武公哀不忍絕其社稷錫不毛之地

集解何休曰
堯堯不生五

穀曰不毛謙
不敢求肥饒使復得改事君王孤之願也然非所敢望

也敢布腹心惟命是聽莊王為却三十里而後舍楚羣

臣曰自郢至此士大夫亦久勞矣今得國舍之何如莊

王曰所為伐伐不服也今已服尚何求乎卒去晉聞楚

之伐鄭發兵救鄭其來持兩端故遲比至河楚兵已去

晉將率或欲渡或欲還卒渡河莊王聞還擊晉鄭反助

楚大破晉軍於河上十年晉來伐鄭以其反晉而親楚也十一年楚莊王伐宋宋告急于晉晉景公欲發兵救宋伯宗諫晉君曰天方開楚未可伐也乃求壯士得霍人解揚字子虎誑楚令宋毋降過鄭鄭與楚親乃執解揚而獻楚楚王厚賜與約使反其言令宋趣降三要乃許於是楚登解揚樓車

集解服虔曰樓車所以窺望敵軍兵法所謂雲梯者杜預曰樓

車車上望櫓也

令呼宋遂負楚約而致其晉君命曰晉方悉國

兵以救宋宋雖急慎毋降楚晉兵今至矣楚莊王大怒

將殺之解揚曰君能制命為義臣能承命為信受吾君

命以出有死無隕

集解服虔曰隕墜也

莊王曰若之許我已而背

之其信安在解揚曰所以許王欲以成吾君命也將死

顧謂楚軍曰為人臣毋忘盡忠得死者楚王諸弟皆諫

王赦之於是赦解揚使歸晉爵之為上卿十八年襄公

卒子悼公潰立

索隱劉音秘鄒本一作弗一作沸左傳作費音扶味反

悼公元年

鄒公

集解徐廣曰音許許公靈公也

惡鄭於楚悼公使弟踰於楚自訟

索隱踰音公遜反

訟不直楚囚踰於是鄭悼公來與晉平遂親

踰私於楚子反子反言歸踰於鄭二年楚伐鄭晉兵來
救是歲悼公卒立其弟踰是為成公成公三年楚共王
曰鄭成公孤有德焉使人來與盟成公私與盟秋成公
朝晉晉曰鄭私平於楚執之使藥書伐鄭四年春鄭患
晉圍公子如乃立成公庶兄繻為君

索隱繻音須鄒氏云一作纏

其

四月晉聞鄭立君乃歸成公鄭人聞成公歸亦殺君繻
迎成公晉兵去十年背晉盟盟於楚晉厲公怒發兵伐
鄭楚共王救鄭晉楚戰鄆陵楚兵敗晉射傷楚共王目

俱罷而去十三年晉悼公伐鄭兵於洧上

集解服虔曰洧水名正義

括地志云洧水在鄭州新鄭縣北三里古新鄭城南韓詩外傳云鄭俗二月桃花水出時會於溱洧水上以自

祓除按在古城城南與溱水合鄭城守晉亦去十四年成公卒子惲立

是為釐公

索隱惲音紆粉反左傳作髡碩

釐公五年鄭相子駟朝釐公

釐公不禮子駟怒使厨人藥殺釐公

集解徐廣曰年表云子駟使賊夜弑

釐公赴諸侯曰釐公暴病卒立釐公子嘉嘉時年五歲是

為簡公簡公元年諸公子謀欲誅相子駟子駟覺之反

盡誅諸公子二年晉伐鄭鄭與盟晉去冬又與楚盟子

駟畏誅故兩親晉楚三年相子駟欲自立為君公子子
孔使尉止殺相子駟而代之子孔又欲自立子產曰子
駟為不可誅之今又效之是亂無時息也於是子孔從
之而相鄭簡公四年晉怒鄭與楚盟伐鄭鄭與盟楚共
王救鄭敗晉兵簡公欲與晉平楚又囚鄭使者十二年
簡公怒相子孔專國權誅之而以子產為卿十九年簡
公如晉請衛君還而封子產以六邑

集解服虔曰
四井為邑

子產

讓受其三邑二十二年吳使延陵季子於鄭見子產如

舊交謂子產曰鄭之執政者侈難將至政將及子子為政必以禮不然鄭將敗子產厚遇季子二十三年諸公子爭寵相殺又欲殺子產公子或諫曰子產仁人鄭所以存者子產也勿殺乃止二十五年鄭使子產於晉問平公疾平公曰卜而曰實沉臺駘為祟史官莫知敢問

對曰高辛氏有二子長曰閼伯季曰實沉居曠林

集解賈逵

曰曠大也不相能也日操干戈以相征伐后帝弗臧

集解賈逵曰后

帝堯也臧善也遷閼伯于商丘主辰

集解賈逵曰商丘在漳南杜預曰商邱宋地服虔曰

辰大火商人是因故辰為商星

集解服虔曰商人契之先湯之始祖相土封闕

伯之故地因其

故國而代之 遷實沉于大夏主參

集解服虔曰大夏在汾澮之間主祀

參星杜預曰大夏今晉陽縣

唐人是因服事夏商

集解賈逵曰唐人謂陶唐氏之胤劉

累也事夏帝孔甲封於大夏因實沉之國子孫服事夏商也正義括地志云故唐城在絳州翼城縣西二十里

徐才宗國都城記云唐國帝堯之裔子所封春秋云夏孔甲時有堯苗胄劉累者以豢龍事孔甲夏后嘉之賜

曰御龍氏以更豕韋之後龍一雌死潛醢之以食夏后既而使之懼而遷於魯縣夏后蓋別封劉累之後於

夏之墟為唐侯至周成王時唐人作亂成王滅之而封大叔遷唐子孫於杜謂之杜伯范氏所云在周為唐杜

氏也地記云唐氏在大夏之墟屬河東安縣今在絳城西北一百里有唐城者以為唐舊國然則叔虞之封即

此地也

其季世曰唐叔虞

集解杜預曰唐人之季世其君曰叔虞

當武王邑

姜方娠大叔夢帝謂已

集解賈逵曰帝天也已武王也

余命而子曰虞

集解杜預曰取唐君之名

乃與之唐屬之參而蕃育其子孫及生有

文在其掌曰虞遂以命之及成王滅唐而國大叔焉故

參為晉星

集解賈逵曰晉主祀參參為晉星

由是觀之則實沉參神也

昔金天氏有稟子曰昧為玄冥師

集解服虔曰金天少皞也玄冥水官也師

長也昧為水官之長

生允格臺駘

集解服虔曰允格臺駘兄弟也

臺駘能業其官

集解服虔曰脩昧之職

宣汾洧

集解賈逵曰宣猶通也汾洧二水名

障大澤

集解服虔曰陂

障其以處太原

集解服虔曰太原汾水名杜預曰太原晉陽也臺駘之所居也

帝用嘉

之國之汾川

集解服虔曰帝顓頊也

沈如蓐黃實守其祀

集解賈逵曰四

國臺駘之後也

今晉主汾川而滅之

集解賈逵曰滅四國

由是觀之則臺

駘汾洮神也然是二者不害君身山川之神則水旱之

菑崇之

集解服虔曰崇為營攢用幣也若有旱則崇祭山川之神以祈福也

日月星辰之

神則雪霜風雨不時崇之若君疾飲食哀樂女色所生

也平公及叔嚮曰善博物君子也厚為之禮於子產二

十七年夏鄭簡公朝晉冬畏楚靈王之彊又朝楚子產

從二十八年鄭君病使子產會諸侯與楚靈王盟於申
誅齊慶封三十六年簡公卒子定公寧立秋定公朝晉
昭公定公元年楚公子棄疾弒其君靈王而自立為平
王欲行德諸侯歸靈王所侵鄭地于鄭四年晉昭公卒
其六卿彊公室卑子產謂韓宣子曰為政必以德毋忘
所以立六年鄭火公欲禳之子產曰不如脩德八年楚
太子建來奔十年太子建與晉謀襲鄭鄭殺建建子勝
奔吳十一年定公如晉晉與鄭謀誅周亂臣入敬王于

周索隱王避弟子朝之亂出居狄泉在昭二十三年至二十六年晉鄭入之經曰天王入于成周是也十

三年定公卒子獻公蠆立獻公十三年卒子聲公勝立

當是時晉六卿彊侵奪鄭鄭遂弱聲公五年鄭相子產

卒

正義括地志云子產墓在新鄭縣西南三十五里鄭元注水經云子產墓在澗水上累石為方墳墳東北

向鄭城杜預曰言不忘本也鄭人皆哭泣悲之如亡親戚子產者鄭

成公少子也為人仁愛人事君忠厚孔子嘗過鄭與子

產如兄弟云及聞子產死孔子為泣曰古之遺愛也

集解

賈逵云愛惠也杜預云子產見愛有古人遺風也兄事子產八年晉范中行氏

反晉告急於鄭鄭救之晉伐鄭敗鄭軍於鐵

集解杜預曰戚城南

鐵邱正義括地志云鐵邱在滑州衛南縣東南十五里

十四年宋景公滅曹二十

年齊田常弒其君簡公而常相於齊二十二年楚惠王

滅陳孔子卒二十六年晉知伯伐鄭取九邑三十七年

聲公卒子哀公易立

集解駟案年表云三十八年

哀公八年鄭人弒

哀公而立聲公弟丑是為共公共公三年晉滅知伯三

十年共公卒子幽公已立幽公元年韓武子伐鄭殺幽

公鄭人立幽公弟駘是為繻公

集解駟案年表曰鄭立幽公子駘繻或作繻

繻公十五年韓景侯伐鄭取雍邱鄭城京十六年鄭伐

韓敗韓兵於負黍

集解徐廣曰在陽城正義括地志云負黍亭在洛州陽城縣西南三十五

里故周邑也

二十年韓趙魏列為諸侯二十三年鄭圍韓之

陽翟二十五年鄭君殺其相子陽二十七年子陽之黨

共弑繻公駘而立幽公弟乙為君是為鄭君

集解徐廣曰一本云

立幽公弟乙陽為君是為康公六國年表云立幽公子駘又以鄭君陽為鄭康公乙班固云鄭康公乙為韓所

滅鄭君乙立二年鄭負黍反復歸韓十一年韓伐鄭取

陽城二十一年韓哀侯滅鄭并其國

太史公曰語有之以權利合者權利盡而交踈甫瑕是也甫瑕雖以劫殺鄭子內厲公厲公終背而殺之此與晉之里克何異守節如荀息身死而不能存奚齊變所從來亦多故矣

索隱述贊曰厲王之子得封於鄭代職司徒緇衣在
詠歸館缺邑祭足專命莊既犯王厲亦奔命居櫟克
入夢蘭躡慶伯服生囚叔瞻尸聘釐簡
之後公室不競負黍雖還韓哀日盛

史記卷四十二

史記卷四十二考證

鄭世家鄭桓公友者周厲王少子而宣王庶弟也○臣

照按春秋之例母弟稱弟繫兄為尊以異於其餘公

子僖二十四年左傳曰鄭有厲宣之親以厲王之子而兼云宣王明是其母弟也服虔杜預皆云母弟此鄭世家云宣王庶弟皇甫謐亦云庶弟乃年表又云鄭桓公友宣王母弟世家年表同出馬遷不宜自乖異豈傳聞異辭故兩著於管耶

友初封於鄭索隱系本云桓公居域林○鄭康成詩譜
韋昭國語註皆作咸林

於是卒言王東徙其民維東而虢郟果獻十邑○

臣照

按虢郟獻十邑事先儒多言其非實毛詩疏云馬遷
見國語有史伯為桓公謀取十邑之文不知桓身未
得故傳會為此說耳外傳云皆子男之國虢郟為大
則八邑各為其國非虢郟之地無由得獻之桓公也
又左傳疏云按鄭語桓公始謀未取之也武公始國

非桓公也全滅虢鄆非獻邑也

又集解十邑謂虢鄆鄆蔽補丹依曝歷莘也○監本訛丹為舟訛莘為華今俱改正

又索隱虞翻注皆依國語為說○說監本訛作記今改正

生太子寤生生之難及生夫人弗愛後生少子叔段段生易夫人愛之○臣照按十六國春秋西燕慕容皝妻晝寢而生子左右以告方寤而起其夫曰此兒易

生似鄭莊公據此則鄭莊公生之易也諸儒解左傳者並不用馬遷之說

潁谷之考叔正義即酈元注水經○元監本訛作云今改正

三十三年宋殺孔父○春秋經宋督殺孔父在魯桓二
年據年表於鄭莊為三十四年

九月辛亥忽出奔衛○辛亥左傳作丁亥

夏厲公出居邊邑櫟○春秋經魯桓十五年五月鄭伯

突出奔蔡秋九月鄭伯突入于櫟

秋厲公卒○春秋經魯莊二十一年夏五月辛酉鄭伯突卒此秋字應是夏字之訛

子文公躒立○左傳作捷監本訛作躒今改正

冬翟攻伐襄王○攷左傳事在秋

鄭司城繒賀以鄭情賣之○余有丁曰左傳賣鄭者杞子乃秦人之戍鄭者

敗秦兵於汪○左傳秦晉戰於彭衙秦師敗績此汪疑

彭衙之誤

鄭與晉盟鄆陵○左傳作辰陵

孤之罪也○之監本訛作乏今改正

兵於洧上正義與溱水合○合監本訛作名今改正

而國太叔焉○焉監本訛作為今改正

秋定公朝晉昭公○左傳事在夏

十三年定公卒○年表十六年卒

子獻公薑立○公羊作薑

聲公五年鄭相子產卒○

臣照

按左傳魯昭二十年鄭

子產有疾疾數月而卒是年當鄭定公之八年距聲

公五年蓋相隔二十七年矣應從左傳

子產者鄭成公少子也○徐孚遠曰按傳子產公子發之子公孫僑非成公少子也

二十二年楚惠王滅陳○哀十七年左傳楚滅陳是年於聲公為二十三年

共公三年晉滅知伯○六國年表在共公二年

史記卷四十二考證

欽定四庫全書

史部

史記卷四十三至五十五

詳校官侍讀學士臣陸伯焜

洗馬臣王坦修覆勘

覆校官中書臣孫希旦

校對官中書臣陳墉

謄錄舉人臣胡念祖

欽定四庫全書

史記卷四十三

漢 太 史

令司馬遷 撰

宋中郎外兵曹參 軍裴 駟集解

唐國子博士弘文館學士司馬貞索隱

唐諸王侍讀率府長史張守節正義

趙世家第十三

趙氏之先與秦共祖至中行爲帝大戊御 其後

正義中音仲

世蜚廉有子二人而命其一子曰惡來事紂為周所殺

其後為秦惡來弟曰季勝其後為趙季勝生孟增孟增

幸於周成王是為宅臯狼

集解徐廣曰或云臯狼地名在西河索隱按如此說是名

孟增號宅臯狼而徐廣云臯狼地名在西河者按地理志臯狼是西河郡之縣名蓋孟增幸於周成王成王居

之於臯狼故云臯狼 臯狼生衡父衡父生造父造父幸於周繆王

造父取驥之乘匹

索隱言造父取八駿品其色齊其力使馴調也並四曰乘兩曰匹正義乘

食證反並四曰乘兩曰足取八駿品其力使均馴

與桃林

正義括地志云桃林在陝州桃林縣西至

潼關皆為桃林塞地山海經云夸父之山北有林焉名曰桃林廣闊三百里中多馬造父於此得驂騮騾耳之

乘獻周盜驪驛騶綠耳獻之繆王繆王使造父御西巡

狩見西王母樂之忘歸

索隱穆天子傳曰穆王與西王母觴於瑤池之上作歌是樂而

忘歸也而譙周不信此事而云余嘗聞之代俗以東西陰陽所出入宗其神謂之王父母或曰地名在西域有

何據而徐偃王反

正義括地志云大徐城在泗州徐城縣北三十里古之徐國也博物志云

徐君宮人娠生卵以為不祥棄於水濱孤獨母有犬名鵠倉銜所棄卵以歸覆煖之遂成小兒生偃王故宮人

聞之更收養之及長襲為徐君後鵠倉臨繆王日馳千

里馬攻徐偃王大破之

索隱譙周曰徐偃王與楚文王同時去周穆王遠矣且王者行

有周衛豈聞亂而獨長驅日乃賜造父以趙城

正義晉州趙城

縣即造父邑也

由此為趙氏自造父已下六世至奄父曰公仲

周宣王時伐戎為御及千畝戰

正義括地志云千畝原在晉州岳陽縣北九十

里也

奄父脫宣王奄父生叔帶叔帶之時周幽王無道去

周如晉事晉文侯始建趙氏于晉國自叔帶以下趙宗

益興五世而生趙夙趙夙晉獻公之十六年伐霍魏耿

而趙夙為將伐霍霍公求犇齊

集解徐廣曰一作來

晉大旱卜

之曰霍太山為祟使趙夙召霍君於齊復之以奉霍太

山之祀晉復穰晉獻公賜趙夙耿

索隱今河東皮氏縣耿鄉

夙生共

孟當魯閔公之元年也共孟生趙衰字子餘

索隱系本云公明生

共孟及趙夙夙生成季衰衰生宣孟盾左傳云衰趙夙弟而此云共孟生衰譙周亦以此為誤

趙衰卜

事晉獻公及諸公子莫吉卜事公子重耳吉即事重耳

重耳以驪姬之亂亡奔翟趙衰從翟伐厲咎如得二女

翟以其少女妻重耳長女妻趙衰而生盾初重耳在晉

時趙衰妻亦生趙同趙括趙嬰齊趙衰從重耳出亡凡

十九年得反國重耳為晉文公趙衰為原大夫居原任

國政

索隱系本云成季徙原宋忠云今鴈門原平縣也正義括地志云原平故城漢原平縣也在代州崞

縣南三十五里崞音郭按宋忠說非也括地志云故原城在懷州濟源縣西北二里左傳云襄王以原賜晉文

公原不服文公伐原以示信原降以趙衰為原大夫即此也原本周畿內邑也文公所以反國

及霸多趙衰計策語在晉事中趙衰既反晉晉之妻固

要迎翟妻而以其子盾為適嗣晉妻三子皆下事之晉

襄公之六年而趙衰卒諡為成季趙盾代成季任國政

二年而晉襄公卒太子夷臯年少盾為國多難欲立襄

公弟雍雍時在秦使使迎之太子母日夜啼泣索隱穆嬴也

頓首謂趙盾曰先君何罪釋其適子而更求君趙盾患

之恐其宗與大夫襲誅之廼遂立太子是為靈公發兵
距所迎襄公弟於秦者靈公既立趙盾益專國政靈公
立十四年益驕趙盾驟諫靈公弗聽及食熊蹯不熟
殺宰人持其尸出趙盾見之靈公由此懼欲殺盾盾素
仁愛人嘗所食桑下餓人反扞救盾盾以得亡未出境
而趙穿弒靈公而立襄公弟黑臀是為成公趙盾復反
任國政君子譏盾為正卿亡不出境反不討賊故太史
書曰趙盾弒其君晉景公時

索隱成公
之子名據

而趙盾卒諡為

宣孟子朔嗣趙朔晉景公之三年朔為晉將下軍救鄭

與楚莊王戰河上朔娶晉成公姊為夫人晉景公之三

年大夫屠岸賈欲誅趙氏

集解徐廣曰按年表救鄭及誅滅皆景公三年

初趙

盾在時夢見叔帶持要而哭甚悲已而笑拊手且歌盾

卜之兆絕而後好好趙史援占之曰此夢甚惡非君之身

乃君之子然亦君之咎至孫趙將世益衰屠岸賈者始

有寵於靈公及至於景公而賈為司寇將作難乃治靈

公之賊以攻趙盾徧告諸將曰盾雖不知猶為賊首以

臣弑君子孫在朝何以懲臯請誅之韓厥曰靈公遇賊趙盾在外吾先君以為無罪故不誅今諸君將誅其後是非先君之意而今妄誅妄誅謂之亂臣有大事而君不聞是無君也屠岸賈不聽韓厥告趙朔趣亡朔不肯曰子必不絕趙祀朔死不恨韓厥許諾稱疾不出賈不請而擅與諸將攻趙氏於下宮殺趙朔趙同趙括趙嬰齊皆滅其族趙朔妻成公姊有遺腹走公宮匿趙朔客曰公孫杵臼杵臼謂朔友人程嬰曰胡不死程嬰曰朔

之婦有遺腹若幸而男吾奉之即女也吾徐死耳居無
何而朔婦免身生男屠岸賈聞之索於宮中夫人置兒
絝中祝曰趙宗滅乎若號即不滅若無聲及索兒竟無
聲已脫程嬰謂公孫杵臼曰今一索不得後必且復索
之奈何公孫杵臼曰立孤與死孰難程嬰曰死易立孤
難耳公孫杵臼曰趙氏先君遇子厚子彊為其難者吾
為其易者請先死乃二人謀取他人嬰兒負之衣以文
葆

葆

集解徐廣曰
小兒被曰葆

匿山中程嬰出謬謂諸將軍曰嬰不肖

不能立趙孤誰能與我千金吾告趙氏孤處諸將皆喜
許之發師隨程嬰攻公孫杵臼杵臼謬曰小人哉程嬰
昔下宮之難不能死與我謀匿趙氏孤兒今又賣我縱
不能立而忍賣之乎抱兒呼曰天乎天乎趙氏孤兒何
罪請活之獨殺杵臼可也諸將不許遂殺杵臼與孤兒
諸將以為趙氏孤兒良已死皆喜然趙氏真孤乃反在
程嬰卒與俱匿山中居十五年晉景公疾卜之大業之
後不遂者為崇景公問韓厥厥知趙孤在乃曰大業之

後在晉絕祀者其趙氏乎夫自中衍者皆嬴姓也中衍人面鳥喙降佐殷帝大戊及周天子皆有明德下及幽厲無道而叔帶去周適晉事先君文侯至于成公世有立功未嘗絕祀今吾君獨滅趙宗國人哀之故見龜策唯君圖之景公問趙尚有後子孫乎韓厥具以實告於是景公乃與韓厥謀立趙孤兒召而匿之宮中諸將入問疾景公因韓厥之衆以脅諸將而見趙孤趙孤名曰武諸將不得已乃曰昔下宮之難屠岸賈為之矯以君

命并命羣臣非然孰敢作難微君之疾羣臣因且請立

趙後今君有命羣臣之願也於是召趙武程嬰徧拜諸

將遂反與程嬰趙武攻屠岸賈滅其族復與趙武田邑

如故

集解徐廣曰推次晉復與趙武田邑是景公之十七年也而乃是春秋成公八年經書晉殺其大夫

趙同趙括左傳於此說立趙武事者註云終說之耳非此年也及趙武冠為成人程嬰

乃辭諸大夫謂趙武曰昔下宮之難皆能死我非不能

死我思立趙氏之後今趙武既立為成人復故位我將

下報趙宣孟與公孫杵臼趙武啼泣頓首固請曰武願

苦筋骨以報子至死而子忍去我死乎程嬰曰不可彼
以我為能成事故先我死今我不報是以我事為不成
遂自殺趙武服齊衰三年為之祭邑春秋祠之世世勿

絕

集解駟案新序曰程嬰公孫杵臼可謂信友厚士矣
嬰之自殺下報亦過矣正義今河東趙氏祠先人猶

別舒一座
祭二士矣

趙氏復位十一年而晉厲公殺其大夫三卻

藥書畏及乃遂殺其君厲公更立襄公曾孫周

集解徐
廣曰年

表云襄公孫也索隱晉
系家云襄公少子名周

是為悼公晉由此大夫稍彊趙

武續趙宗二十七年晉平公立平公十二年而趙武為

正卿十三年吳延陵季子使於晉曰晉國之政卒歸於

趙武子韓宣子魏獻子之後矣趙武死諡為文子文子

生景叔

索隱系本云景叔名成

景叔之時齊景公使晏嬰於晉

集解

徐廣曰平公之十九年

晏嬰與晉叔向語嬰曰齊之政後卒歸田

氏叔向亦曰晉國之政將歸六卿六卿侈矣而吾君不

能恤也趙景叔卒生趙鞅是為簡子趙簡子在位晉頃

公之九年簡子將合諸侯戍於周其明年入周敬王于

周辟弟子朝之故也晉頃公之十二年六卿以法誅公

族祁氏羊舌氏分其邑為十縣六卿各令其族為之大夫晉公室由此益弱後十三年魯賊臣陽虎來奔趙簡子受賂厚遇之趙簡子疾五日不知人大夫皆懼醫扁鵲視之出董安于問

集解章昭曰安于簡子家臣

扁鵲曰血脉治也

而何怪在昔秦繆公嘗如此七日而寤寤之日告公孫

支與子輿

索隱二子秦大夫公孫支子桑

曰我之帝所甚樂吾所以久

者適有學也帝告我晉國將大亂五世不安其後將霸未老而死霸者之子且令而國男女無別公孫支書而

藏之

索隱藏一作籍籍錄也謂當時即記錄書之於籍也

秦讖於是出矣獻公之

亂文公之霸而襄公敗秦師於殽而歸縱淫此子之所聞今主君之疾與之同不出三日疾必間間必有言也居二日半簡子寤語大夫曰我之帝所甚樂與百神游於鈞天廣樂九奏萬舞不類三代之樂其聲動人心有一熊欲來援我帝命我射之中熊熊死又有一羆來我又射之中羆羆死帝甚喜賜我二笥皆有副吾見兒在帝側帝屬我一翟犬曰及而子之壯也以賜之帝告我

晉國且世衰七世而亡

正義謂晉定公出公哀公幽公烈公孝公靜公為七世靜公二

年為三晉所滅據此及年表簡子之疾在定公十一年

嬴姓將大敗周人於范魁

之西

正義嬴趙姓也周人謂衛也晉亡之後趙成侯三年取衛都鄆七十三是也賈逵云川阜曰魁也

而亦不能有也

索隱范魁地名不在蓋趙地也

今余思虞舜之勲適

余將以其胄女孟姚配而七世之孫

索隱即姪嬴吳廣之女姚姓孟字也

七代孫武靈王也

董安于受言而書藏之以扁鵲言告簡子簡

子賜扁鵲田四萬畝他日簡子出有人當道辟之不去

從者怒將刃之當道者曰吾欲有謁於主君從者以聞

簡子名之曰嚳吾有所見子晰也

索隱簡子見當道者乃寤曰嚳是故吾前

夢所見者知其名曰子晰也

當道者曰屏左右願有謁簡子屏人當

道者曰主君之疾臣在帝側簡子曰然有之子之見我

我何為當道者曰帝令主君射熊與羆皆死簡子曰是

且何也當道者曰晉國且有難主君首之帝令主君

滅二卿夫熊與羆皆其祖也

正義范氏中
行氏之祖也

簡子曰帝賜

我二筭皆有副何也

正義副謂
皆子姓也

當道者曰主君之子將

克二國於翟皆子姓也

正義謂代
及智氏也

簡子曰吾見兒在帝

側帝屬我一翟犬曰及而子之長以賜之夫兒何謂以

賜翟犬當道者曰兒主君之子也翟犬者代之先也主

君之子且必有代及主君之後嗣且有草政而胡服

正義

謂今時服也
廢除裘裳也

并二國於翟

正義武靈王畧中山地至寧
葭西畧胡地至樓煩榆中是

也簡子問其姓而延之以官當道者曰臣野人致帝命

耳遂不見簡子書藏之府異曰姑布子卿見簡子

集解
司馬

彪曰姑布
姓子卿字

簡子徧召諸子相之子卿曰無為將軍者簡

子曰趙氏其滅乎子卿曰吾嘗見一子於路殆君之子

也簡子召子毋卹毋卹至則子卿起曰此真將軍矣簡子曰此其母賤翟婢也奚道貴哉子卿曰天所授雖賤必貴自是之後簡子盡召諸子與語毋卹最賢簡子乃告諸子曰吾藏寶符於常山上先得者賞諸子馳之常山上求無所得毋卹還曰已得符矣簡子曰奏之毋卹曰從常山上臨代代可取也

正義地道記云恒山在上曲陽縣西北百四十里北

行四百五十里得恒山峽號飛狐口北則代郡也

簡子於是知毋卹果賢乃廢

太子伯魯而以毋卹為太子後二年晉定公之十四年

范中行作亂明年春簡子謂邯鄲大夫午曰歸我衛士

五百家吾將置之晉陽

集解服虔曰往年趙鞅圍衛衛人恐懼故貢五百里鞅置之邯

鄲又欲更徙於晉陽午許諾歸而其父兄不聽

集解服虔曰午之諸父兄及邯鄲中

長倍言趙鞅捕午囚之晉陽乃告邯鄲人曰我私有誅

午也諸君欲誰立

集解杜預曰午趙鞅同族別封邯鄲故使邯鄲人更立午宗親也

遂

殺午趙稷涉賓以邯鄲反

集解服虔曰稷午子

晉君使籍秦圍邯

鄲

集解駟案左傳曰籍秦此時為上軍司馬索隱系本籍秦晉大夫籍游之孫籍談之子

荀寅范

吉射與午善

集解駟案左傳曰午荀寅之甥荀寅范吉射之姻索隱系本云晉大夫逝遨生桓伯

林父林父生宣伯庚庚生獻伯偃偃生穆伯吳吳生寅
本姓荀自荀偃將中軍晉改中軍曰中行因氏焉元與
智氏同祖逝遼故智氏亦稱荀范氏晉大夫隰叔之子
士為之後為生成伯缺缺生武子會會生文叔燮燮生
宣叔句句生獻子
鞅鞅生吉射也 不肯助秦而謀作亂董安于知之十

月范中行氏

正義按會食邑於范因為范氏又中行寅
本姓荀自荀偃將中軍為中行因號中行

氏元與智氏因承
襲逝遼姓荀氏

伐趙鞅鞅奔晉陽晉人圍之范吉射

荀寅仇人魏襄等謀逐荀寅以梁嬰父代之

集解賈逵曰梁嬰父

晉大夫也

逐吉射以范臯繹代之

集解服虔曰范氏之側室子

荀躒言於

晉侯曰

集解服虔曰荀躒智文子索隱系本云逝遼生
莊子首首生武子螢螢生莊子朔朔生悼子盈

盈生文子櫟櫟生宣
子申中生智伯瑤
君命大臣始亂者死今三臣始亂

集解賈逵曰
范中行趙也
而獨逐鞅用刑不均請皆逐之十一月荀

躒韓不佞魏哆奉公命以伐范中行氏
索隱不佞韓簡子哆魏簡子系

本名
不克范中行氏反伐公公擊之范中行敗走丁未

二子奔朝歌
索隱范吉射荀寅也
韓魏以趙氏為請
集解服虔曰以其罪輕於

荀范也正義按趙鞅被范中行伐乃奔晉
陽以其罪輕故韓魏為請晉君而得入絳
十二月辛未

趙鞅入絳盟于公宮其明年知伯文子謂趙鞅曰范中

行雖信為亂安于發之是安于與謀也晉國有法始亂

者死夫二子已伏罪而安于獨在趙鞅患之安于曰臣
死趙氏定晉國寧吾死晚矣遂自殺趙氏以告知伯然
後趙氏寧孔子聞趙簡子不請晉君而執邯鄲午保晉
陽故書春秋曰趙鞅以晉陽畔趙簡子有臣曰周舍好
直諫周舍死簡子每聽朝常不悅大夫請臯簡子曰大
夫無罪吾聞千羊之皮不如一狐之腋諸大夫朝徒聞
唯唯不聞周舍之鄂鄂是以憂也

集解駟案韓詩外傳
曰周舍立于門下三

日三夜簡子使問之曰子欲見寡人何事對曰願為鄂
鄂之臣墨筆操牘從君之過而日有記月有成歲有效

也簡子由此能附趙邑而懷晉人晉定公十八年趙簡

子圍范中行于朝歌中行文子奔邯鄲

索隱荀寅也

明年衛

靈公卒簡子與陽虎送衛太子蒯聵于衛衛不內居戚

正義括地志云故戚城在相州澶水縣東三十里杜預云戚衛邑在頓邱縣西有戚城是也

晉定公

二十一年簡子拔邯鄲中行文子奔栢人簡子又圍栢

人行文子范昭子遂奔齊

索隱吉射也

趙竟有邯鄲栢人

范中行餘邑入于晉趙名晉卿實專晉權奉邑侷於諸

侯晉定公三十年定公與吳王夫差爭長於黃池趙簡

子從晉定公卒長吳定公三十七年卒而簡子除三年

之喪期而已是歲越王勾踐滅吳晉出公十一年知伯

伐鄭趙簡子疾使太子毋卹將而圍鄭知伯醉以酒灌

擊毋卹毋卹羣臣請死之母卹曰君所以置毋卹為能

忍詢然亦愠知伯知伯歸因謂簡子使廢毋卹簡子不

聽毋卹由此怨知伯晉出公十七年簡子卒

集解張華曰趙簡子

冢在臨水界二冢並上氣成樓閣

太子毋卹代立是為襄子趙襄子元

年越圍吳

正義年表及趙世家云左傳越滅吳在簡子三十五年已在襄子元年前十五年吳何得

更有越圍吳之事從此以下至問襄子降喪食使楚隆

問吳王

正義左哀公二十年傳云簡子死襄子嗣立以越圍吳故降父之祭饌而使楚隆慰問王為哀

公十三年簡子在黃池之役與吳王質言曰好惡同之故減祭饌及問吳王也而趙世家及六國年表云此年

晉定公卒簡子除三年之喪服暮而已按襄子姊前為簡子死及使吳年月皆誤與左傳文不同

代王夫人簡子既葬未除服北登夏屋

集解徐廣曰山在廣武正義括

地志云夏屋山一名賈屋山今名賈母山在代州鴈門縣東北三十五里夏屋與句注山相接蓋北方之險亦

天下之阻路所以分列內外也請代王使厨人操銅料
正義音斗合作料其形方有柄

取斟水器說文云鉤也以食代王及從者行斟陰令宰人各
集解徐廣

曰一作維以料擊殺代王及從官遂興兵平代地其姊聞之

泣而呼天磨笄自殺代人憐之所死地名之為磨笄之

山正義笄今簪也括地志云磨笄山一名磨笄山亦名

為山在蔚州飛狐縣東北百五十里魏土地記云代郡東南二十五里有馬頭山趙襄子既殺代王使人迎其姊代王夫人曰以弟慢夫非仁也以夫怨弟非義也磨笄自殺而死使者亦自殺也遂以代封伯魯子周為代成君伯魯者

襄子兄故太子太子蚤死故封其子襄子立四年知伯

與趙韓魏盡分其范中行故地晉出公怒告齊魯欲以

伐四卿四卿恐遂共攻出公出公奔齊道死知伯乃立

昭公曾孫驕是為晉懿公

索隱或作哀公其大父名雍即昭公少子號戴子也知

伯益驕請地韓魏韓魏與之請地趙趙不與以其圍鄭

之辱知伯怒遂率韓魏攻趙趙襄子懼乃奔保晉陽原

過從後至於王澤

正義括地志云王澤在絳州正平縣南七里也

見三人自帶

以上可見自帶以下不可見與原過竹二節莫通曰為

我以是遺趙毋卹原過既至以告襄子襄子齊三日親

自剖竹有朱書曰趙毋卹余霍泰山

集解徐廣曰在河東永安縣

山

陽侯天使也三月丙戌余將使女反滅知氏女亦立我

百邑余將賜女林胡之地至于後世且有仇王亦黑龍

面而鳥喙鬢麋髭頰大膺大胃脩下而馮左衽界乘集解

徐廣曰脩或作隨界一作介奄有河宗正義穆天子傳云河宗之子孫則栢絮按蓋在龍門河之

上流嵐勝二州之地也至于休溷諸貉正義音陌自河宗休溷諸貉乃戎狄之地也南

伐晉別正義趙南伐晉之別邑謂韓魏之邑也北滅黑姑正義亦戎國襄子再

拜受三神之令三國攻晉陽歲餘引汾水灌其城城不

浸者三版正義何休云八尺曰版城中懸釜而炊易子而食羣臣

皆有外心禮益慢唯高共集解徐廣曰一作赫不敢失禮襄子懼

乃夜使相張孟同私於韓魏索隱戰國策作張孟談談者史遷之父名遷例改為

同韓魏與合謀以三月丙戌三國反滅知氏共分其地

於是襄子行賞高共為上張孟同曰晉陽之難唯共無

功襄子曰方晉陽急羣臣皆懈唯共不敢失人臣禮是

以先之於是趙北有代南并知氏彊於韓魏遂祠三神

於百邑使原過主霍泰山祠正義括地志云三神祠今名原過祠今在霍山

也側其後娶空同氏正義括地志云崆峒山在肅州福祿縣東南六十里古西戎地又原州平

高縣西百里亦有崆峒山即黃帝問廣成子道處俱是西戎地未知孰是生五子襄子為伯

魯之不立也不肯立子且必欲傳位與伯魯子代成君

魯君先死乃取代成君子浣立為太子

索隱代成君名周伯魯之子系

本云代成君子起即襄子之子不云伯魯非也

襄子立三十三年卒浣立是為

獻侯獻侯少即位治中年

集解駟案地理志云河南中牟縣趙獻侯自耿徙此瓚曰

中年在春秋之時是鄭之疆內也及三卿分晉則在魏之邦土也趙界自漳水以北不及此春秋傳曰衛侯如

晉過中年按中年非衛適晉之次也汲郡古文曰齊師伐趙東鄙圍中年此中年不在趙之東也按中年當潔

水之北索隱此趙中年在河北非鄭之中年正義按五鹿在魏州元城縣東十二里鄴即相州湯陰縣西五十

八里有牟山蓋中牟邑在此山側也

襄子弟桓子逐獻侯自立於代

索隱本

云襄子子桓
子與此不同

一年卒國人云桓子立非襄子意乃共殺

其子而復迎立獻侯十年中山武公初立

集解徐廣曰
西周桓公之

子桓公者考王弟而定王子索隱中山古鮮虞國姬姓
也系本云中山武公居顧桓公徙靈壽為趙武靈王所
滅不言誰之子孫徐廣云西周桓
公之子亦無所據蓋未得其實

十三年城平邑

集解
駟案

地理志云代
郡有平邑縣

十五年獻侯卒子烈侯籍立烈侯元年魏

文侯伐中山使太子擊守之六年魏韓趙皆相立為諸

侯追尊獻子為獻侯烈侯好音謂相國公仲連曰寡人

有愛可以貴之乎公仲曰富之可貴之則否烈侯曰然

夫鄭歌者槍石二人

索隱槍音七羊反槍與石二人名

吾賜之田人萬

畝公仲曰諾不與居一月烈侯從代來問歌者田公仲

曰求未有可者有頃烈侯復問公仲終不與乃稱疾不

朝番吾君

集解徐廣曰番音盤常山有番吾縣正義括地志云番吾故城在恒州房山縣東二十里

番滿古今音異耳

自代來謂公仲曰君實好善而未知所持今

公仲相趙於今四年亦有進士乎公仲曰未也番吾君

曰牛畜荀攸徐越皆可公仲乃進三人及朝烈侯復問

歌者田何如公仲曰方便擇其善者牛畜侍烈侯以仁

義約以王道烈侯道然

正義道音由古字與攸同言牛畜以仁義約以王道故止歌者

田攸攸氣行貌寬緩也

明日荀攸侍以選練舉賢任官使能明日

徐越侍以節財儉用察度功德所與無不充君說烈侯

使使謂相國曰歌者之田且止官牛畜為師荀攸為中

尉徐越為內史

正義漢書百官公卿表云少府內史周官秦因之掌治京師

賜相國

衣二襲

單複具為一襲

九年烈侯卒弟武公立

索隱譙周云系本及說趙語者

並無其事蓋別有所據

武公十三年卒趙復立烈侯太子章是為

敬侯是歲魏文侯卒敬侯元年武公子朝作亂不克出

奔魏趙始都邯鄲二年敗齊于靈邱

集解駟案地理志云代郡有靈邱縣

三年救魏于廩邱大敗齊人四年魏敗我兔臺築剛平

正義兔臺剛平並在河北

以侵衛五年齊魏為衛攻趙取我剛平六

年借兵於楚伐魏取棘蒲

正義今趙州平棘縣古棘蒲邑也

八年拔魏

黃城

集解杜預曰陳留外黃縣東有黃城正義括地志云故黃城在魏州冠氏縣南因黃溝為名按陳留

外黃城非隨所別也

九年伐齊齊伐燕趙救燕十年與中山戰于

房子

正義趙州房子縣是

十一年魏韓趙共滅晉分其地伐中山

又戰於中人

集解徐廣曰中山唐縣有中人亭正義括地志云中山故城一名中人亭在定州唐

縣東北四十一里春秋時鮮虞國之中人邑也十二年敬侯卒子成侯種立成

侯元年公子勝與成侯爭立為亂二年六月雨雪三年

大戊午為相

集解徐廣曰一作成

伐衛取鄉邑七十三魏敗我

蘭

正義地理志云屬西河郡也

四年與秦戰高安

正義蓋在河東

敗之五年

伐齊于郵

正義濮州郵城縣是

魏敗我懷攻鄭敗之以與韓韓與

我長子

集解駟案地理志云上黨有長子縣

六年中山築長城伐魏敗涿

澤

正義涿音濁徐廣云長杜有濁澤非也括地志云濁水源出蒲州解縣東北平地爾時魏都安邑韓趙伐

魏豈河南至長杜也解縣濁水近於魏都當是也

圍魏惠王七年侵齊至長城

正義齊長城西頭在濟州平陰縣太山記云太山西北有長城緣河經太山千餘里至瑯琊入海括地志云所侵處在密州南

與韓攻周八年與韓分周以為兩

集解徐廣曰顯

王二年周紀無此正義括地志云史記周顯王二年西周惠公封少子子班於鞏為東周其子武公為秦所滅郭緣生述征記云鞏縣本周鞏伯邑

九年與齊戰阿下

集解徐廣曰戰亦作會也正義阿東

阿也今濟州東阿縣也

十年攻衛取甄十一年秦攻魏趙救之石

阿正義蓋在石隰等州界也

十二年秦攻魏少梁

正義少梁故城在同州韓城縣南二

十二里古少梁國也

趙救之十三年秦獻公使庶長國伐魏少梁

虜其太子痤魏敗我澮取皮牢

集解徐廣曰魏年表曰取趙皮牢正義括地志

云澮水縣在絳州翼城縣東南
二十五里按皮牢當在澮之側
成侯與韓昭侯遇上黨

十四年與韓攻秦十五年助魏攻齊十六年與韓魏分

晉封晉君以端氏

集解徐廣曰在平陽正義端氏澤州縣也

十七年成侯與

魏惠王遇葛孽

集解徐廣曰在馬邱年表曰十八年趙孟如齊

十九年與齊宋

會平陸

正義兗州縣也平陸城即古厥國也

與燕會阿

正義括地志云故葛城一名依城又

名西阿城在瀛州高陽縣西北五十里以徐兗二水並過其西又徂經其北曲曰阿以齊有東阿故曰西阿城

地理志云瀛州屬河間趙分也按燕趙即此地二十年魏獻榮椽因以為檀臺

集解徐廣曰襄國縣有檀臺索隱劉氏云榮椽蓋地名其中有高處可以為臺非也按榮椽是良材可為椽登

飾有光榮所以魏獻之故趙因用之以為檀臺正義鄭
玄云榮屋翼也說文云椽榱也屋栳之兩頭起者為榮
也括地志云檀臺在
洛州臨洛縣北二里
二十一年魏圍我邯鄲二十二年

魏惠王拔我邯鄲齊亦敗魏於桂陵

正義括地志云故桂城在曹州乘氏

縣東北二十一里故老云此即桂陵也

二十四年魏歸我邯鄲與魏盟漳

水上秦攻我蘭二十五年成侯卒公子緤

音薛

與太子肅

侯爭立

索隱系本云肅侯名語

緤敗亡奔韓肅侯元年奪晉君端

氏徙處屯留

正義括地志云屯留故城在潞州長子縣東北三十里本漢屯留縣城也

二年

與魏惠王遇於陰晉

正義地理志云華陰縣魏之陰晉秦惠文王更名寧秦高帝更名華

陰今屬華州

三年公子范襲邯鄲不勝而死四年朝天子六

年攻齊拔高唐七年公子刻攻魏首垣

正義蓋在河北也

十一

年秦孝公使商君伐魏虜其將公子卬趙伐魏十二年

秦孝公卒商君死十五年起壽陵

集解徐廣云在常州

魏惠王卒

十六年肅侯游大陵

集解徐廣曰太原有大陵縣亦曰陵正義括地志云大陵城在并州

文水縣北十三里漢大陵縣城

出於鹿門

正義并州孟縣西有白鹿泓源出白鹿山南渚蓋鹿門在

北山水之側也

大戊午扣馬

集解呂忱曰扣牽馬

曰耕事方急一日不作

百日不食肅侯下車謝十七年圍魏黃不克

集解駟案地理志云

山陽有黃縣正義黃城在魏州前拔之却為魏今趙圍之矣

築長城

正義劉伯莊云蓋從雲中以北

至代按趙長城從蔚州北西至嵐州北盡趙界又疑此長城在潭水之北趙南界

十八年齊魏

伐我我決河水灌之兵去二十二年張儀相秦趙疵與

秦戰敗秦殺疵河西取代藺離石二十三年韓舉

集解徐廣

曰韓將

與齊魏戰死于桑邱

集解駟案地理志云泰山有桑邱縣正義括地志云桑邱

城在易州遂城縣界或云在泰山非也此時齊伐燕桑邱三晉皆來救之不得在泰山有桑邱縣此說甚誤也

二十四年肅侯卒秦楚燕齊魏出銳師各萬人來會葬

子武靈王立

索隱名雍

武靈王元年

集解徐廣曰年表云魏敗我趙護

陽文

君趙豹相梁襄王與太子嗣韓宣王與太子倉來朝信

宮

正義在洺州
臨洺縣也

武靈王少未能聽政博聞師三人左右

司過三人及聽政先問先王貴臣肥義加其秩國三老

年八十月致其禮三年城鄣四年與韓會于區鼠

正義
蓋在

北河五年娶韓女為夫人八年韓擊秦不勝而去五國相

王趙獨否曰無其實敢處其名乎令國人謂己曰君九

年與韓魏共擊秦秦敗我斬首八萬級齊敗我觀澤

正義

括地志云觀澤故城在魏
州頓邱縣東十八里也

十年秦取我西都及中陽

集解

徐廣曰年表曰秦取中都西陽安邑十一年秦
敗我將軍英太原有中都縣西河有中陽縣
齊破燕

燕相子之為君君反為臣十一年王召公子職於韓立

以為燕王

集解徐廣曰紀年亦云爾

使樂池送之

集解駟案燕世家子之死後燕人共

立太子平是為燕昭王無趙送公子職為燕王之事當是趙聞燕亂遙立職為燕王雖使樂池送之竟不能就索隱燕系家無其事蓋是疎也今此云使樂池送之必是憑舊史為說且紀年之書其說又同則裴駟之解得

其十三年秦拔我蘭虜將軍趙莊

正義莊一作范音疋婢反

楚魏王

來過邯鄲十四年趙何攻魏十六年秦惠王卒王遊大陵他日王夢見處女鼓琴而歌詩曰美人熒熒兮顏若

茗之紫

集解綦母邃曰陵苔之草其華紫正義音條毛詩疏云苔饒也幽州謂之翹饒蔓似勞豆而

細葉似蒺藜而青其華細綠色可生食味如小豆藿也又本草經曰陵苔生下濕水中七月生華紫草可以染

帛煮沐頭髮即黑也

命乎命乎曾無我羸

集解綦母邃曰言有命祿生遇其時人莫知已

貴盛盈端也正義按命名也羸姓羸也言世衆名共美好曾無我好羸也重言名呼者以談說衆也 異日

王飲酒樂數言所夢想見其狀吳廣聞之因夫人而內

其女娃羸

集解方言曰娃美也吳有館娃之宮

孟姚也

集解徐廣曰古史考云內其女曰娃

索隱孟姚吳廣女舜之後故上文云余思虞舜之勳故命其胄女孟姚以配而七代之孫是也舜後封虞在河

東太陽山西有上虞城是亦曰吳城虞吳音相近故舜後亦姓吳非獨太伯虞仲之裔

孟姚甚有

寵於王是為惠后十七年王出九門

集解徐廣曰在常山正義本戰國時

趙邑戰國策云本有宮室而居趙武靈王改為九門

為野臺

集解徐廣曰野一作望正義括地志云野

臺一名義臺在定州新樂縣西南六十三里

以望齊中山之境十八年秦武王

與孟說舉龍文赤鼎絕臚而死

集解徐廣曰一作絕臚音亡丁反

趙王

使代相趙固迎公子稷於燕送歸立為秦王是為昭王

十九年春正月大朝信宮召肥義與議天下五日而畢

王北略中山之地至於房子

正義趙州縣也

遂之代北至無窮

西至河登黃華之上

正義黃華蓋西河側之山名也

召樓緩謀曰我先

王因世之變以長南藩之地屬阻漳滏之險立長城又

取藺郭狼敗林人

正義即林胡也

於荏而功未遂今中山在我

腹心北有燕

正義地理志云趙分晉北有信都中山又得渤海郡東平舒等五縣高陽鄭州鄉東有清河河間又

在河以北故言北有燕

東有胡

正義趙東有瀛州之東北營州之境即東

胡烏丸之地服虔云東胡烏丸之先後為鮮卑也

西有林胡樓煩秦韓之邊

正義

林胡樓煩即嵐勝之北也嵐勝以南石州離石蘭等七國時趙邑邊也秦隔河也晉沿潞澤等州皆七國時韓

地為並趙西境也

而無彊兵之救是亡社稷奈何夫有高世之

名必有遺俗之累吾欲胡服樓緩曰善羣臣皆不欲於

是肥義侍王曰簡襄主之烈計胡翟之利為人臣者寵

有孝悌長幼順明之節通有補民益主之業

正義寵貴寵也通達

理也凡為人臣有孝弟長幼順明之節制者得貴寵也有補民益主之功業者為達理也

此兩者臣

之分也今吾欲繼襄王之跡開於胡翟之鄉而卒世不

見也

正義卒子律反盡也言盡世間不見補民益主之忠臣也

為敵弱

正義我為胡服敵人必困

弱也用力少而功多可以毋盡百姓之勞而序往古之勲

正義序重也往古謂趙簡子襄子也

夫有高世之功者負遺俗之累

正義負留

也言古周公孔子留衣冠禮義之俗今變為胡服是負留風俗之譴累也

有獨智之慮者任

驚民之怨

正義言世有獨計智之思慮者必任隱逸教慢之民怨望也

今吾將胡服

騎射以教百姓而世必議寡人奈何肥義曰臣聞疑事

無功疑行無名王既定負遺俗之慮殆無顧天下之議

矣夫論至德者不和於俗成大功者不謀於衆昔者舜

舞有苗禹袒裸國非以養欲而樂志也務以論德而約

功也愚者闇成事智者覩未形則王何疑焉王曰吾不

疑胡服也吾恐天下笑我也狂夫之樂智者哀焉愚者

所笑賢者察焉世有順我者胡服之功未可知也雖驅

世以笑我胡地中山吾必有之於是遂胡服矣使王緡

告公子成曰寡人胡服將以朝也亦欲叔服之家聽於

親而國聽於君古今之公行也子不反親臣不逆君兄

弟之通義也

集解徐廣曰兄弟一作元夷元始也夷平也

今寡人作教易服

而叔不服吾恐天下議之也制國有常利民為本從政

有經令行為上明德先論於賤而行政先信於貴今胡

服之意非以養欲而樂志也事有所止而功有所出

集解

駟案出猶成也正義鄭玄云止至也

事成功立然後善也今寡人恐叔之

逆從政之經以輔叔之議且寡人聞之事利國者行無

邪因貴戚者名不累故願慕公叔之義以成胡服之功

使緹謁之叔

索隱
絕句

請服焉公子成再拜稽首曰臣固聞

王之胡服也臣不佞寢疾未能趨走以滋進也王命之

臣敢對因竭其愚忠曰臣聞中國者蓋聰明徇智之所

居也

集解徐廣曰五帝
本紀曰幼而徇齊

萬物財用之所聚也賢聖之所

教也仁義之所施也詩書禮樂之所用也異敏技能之

所試也遠方之所觀赴也蠻夷之所義行也今王舍此

而襲遠方之服變古之教易古之道逆人之心而佛學者離中國故臣願王圖之也使者以報王曰吾固聞叔之疾也我將自往請之王遂往之公子成家因自請之曰夫服者所以便用也禮者所以便事也聖人觀鄉而順宜因事而制禮所以利其民而厚其國也夫翦髮文

身錯臂左衽

索隱錯臂亦文身謂以丹青錯畫其臂孔衍作右臂左衽謂右袒其臂也 越

之民也

索隱劉氏云今珠崖儋耳謂之甌人是甌越正義按屬南越故言甌越也輿地志云交趾周

時為駱越秦時曰西甌文身斷髮避龍則西甌駱又在番吾之西南越及甌駱皆羊姓也世本云越羊姓也與

楚同祖是也

黑齒雕題

集解劉逵曰以草染齒用白作黑鄭玄曰雕文謂刻其肌以青丹涅之

却冠秫紬

集解徐廣曰戰國策作秫縫紬亦縫紬之別名也秫者蒸紬也古字多假借故作秫紬耳

此蓋言其女功鍼縷之麤拙也又一本作鮭冠黎縹也

大吳之國也故禮服莫同

其便一也鄉異而用變事異而禮易是以聖人果可以

利其國不一其用果可以便其事不同其禮儒者一師

而俗異中國同禮而教離況於山谷之便乎故去就之

變智者不能一遠近之服賢聖不能同窮鄉多異曲學

多辨不知而不疑異於已而不非者公馬而衆求盡善

也今叔之所言者俗也吾所言之者所以制俗也吾國東

有河薄洛之水

集解徐廣曰安平經縣西有漳水津名薄洛津

與齊中山同之

正義爾時齊與中山相親中山趙共薄洛水故言與齊中山同之須有舟楫之備

無舟楫之用

自常山以至代上黨

集解徐廣曰一云自常山以下代上黨以東

東有燕東

胡之境而西有樓煩秦韓之邊今無騎射之備故寡人

無舟楫之用夾水居之民將何以守河薄洛之水變服

騎射以備燕三胡秦韓之邊

索隱林胡樓煩東胡是三胡也

且昔者簡

主不塞晉陽以及上黨而襄主并戎取代以攘諸胡此

愚知所明也先時中山負齊之彊兵侵暴吾地係累吾民引水圍鄣微社稷之神靈則鄣幾於不守也先王醜之而怨未能報也今騎射之備近可以便上黨之形而遠可以報中山之怨而叔順中國之俗以逆簡襄之意惡變服之名以忘鄣事之醜非寡人之所望也公子成再拜稽首曰臣愚不達於王之義敢道世俗之聞臣之臬也今王將繼簡襄之意以順先王之志臣敢不聽命乎再拜稽首乃賜胡服明日服而朝於是始出胡服令

也趙文趙造周昭

集解徐廣曰戰國策作紹昭音紹

趙俊皆諫止王母

胡服如故法便王曰先王不同俗何古之法帝王不相

襲何禮之循處戲神農教而不誅黃帝堯舜誅而不怒

及至三王隨時制法因事制禮法度制令各順其宜衣

服器械各便其用故禮也不必一道而便國不必古聖

人之興也不相襲而王夏殷之衰也不易禮而滅然則

反古未可非而循禮未足多也且服奇者志淫則是鄒

魯無奇行也

索隱按鄒魯好長纓是奇服也服非其志皆淫辟也而有孔門顏冉之屬豈是無奇

行俗辟者民易則是吳越無秀士也

索隱言方俗辟處山谷而人皆改易

不通大化則是吳越無秀士何得有延州來及大夫種之屬哉

且聖人利身謂之服便

事謂之禮夫進退之節衣服之制者所以齊常民也非

所以論賢者也故齊民與俗流賢者與變俱故諺曰以

書御者不盡馬之情以古制今者不達事之變循法之

功不足以高世法古之學不足以制今子不及也遂胡

服招騎射二十年王略中山地至寧葭

索隱一作蔓葭縣名在中山也

西略胡地至榆中

正義勝州北河北岸也

林胡王獻馬歸使樓緩

之秦仇液之韓王賁之楚富丁之魏趙爵之齊代相趙
固主胡致其兵二十一年攻中山趙昭為右軍許鈞為

左軍公子章為中軍王并將之牛翦將車騎趙布并將

胡代趙與之陘

集解徐廣曰一作陸又作陘或宜言趙與之陘陘者山絕之名常山有并陘中

山有苦陘上黨有關與正義與音與陘音荆陘山也在并州并陘縣東南十八里然趙布并將代趙之兵與諸

軍向并陘之側共出定州上曲陽縣合軍攻取丹邱華陽鵠上之關

合軍曲陽

集解徐廣曰上曲陽

在常山下曲陽在鉅鹿正義括地志云上曲陽故城在定州曲陽縣西五里按合軍曲陽即上曲陽也以在常

山郡也

攻取丹邱

正義蓋邢州丹邱縣也

華陽

正義括地志云北岳有五別名一曰蘭臺

府二曰列女宮三曰華陽臺四曰紫臺五曰太
一宮按北岳恒山在定州恒陽縣北百四十里 鷓鴣之塞

正義上昌之反下先代反徐廣曰鷓鴣一作鴻鴻上故關
今名汝城在定州唐縣東北六十里本晉鴻上關城也

又有鴻上水源出唐縣北葛洪山接北岳恒
山與鴻上塞皆在定州然一本作鳴字誤也 王軍取鄣

石邑 集解徐廣曰在常山正義括地志云石邑故
城在恒州鹿泉縣南三十五里六國時舊邑 封龍

正義括地志云封龍山一名飛龍山在
恒州鹿泉縣南四十五里邑因山為名 東垣中山獻四

邑請和王許之罷兵二十三年攻中山二十五年惠后

卒 索隱謂武靈王之后前太子章之母惠文王之嫡母
也惠后卒後吳娃始當正室至孝成二年稱惠文后

卒是也而下文又云吳娃死後娃子
何寵哀故太子欲兩王之是誤也 使周紹胡服傅王

子何二十六年復攻中山攘地北至燕代西至雲中九原二十七年五月戊申大朝於東宮傅國立王子何以為王王廟見禮畢出臨朝大夫悉為臣肥義為相國并傅王是為惠文王惠文王惠后吳娃子也武靈王自號為主父主父欲令子主治國而身胡服將士大夫西北略胡地而欲從雲中九原直南襲秦於是詐自為使者入秦秦昭王不知已而怪其狀甚偉非人臣之度使人逐之而主父馳已脫關矣審問之乃主父也秦人大驚

主父所以入秦者欲自略地形因觀秦王之為人也惠

文王

集解徐廣曰元年以公子勝為相封平原

二年主父行新地遂出代西

遇樓煩王於西河而致其兵三年滅中山遷其王於膚

施

集解徐廣曰在上郡正義今延州膚施縣也

起靈壽

集解徐廣曰在常山

北地方從

代道大通還歸行賞大赦置酒酺五日封長子章為代

安陽君

正義括地志云東安陽故城在朔州定襄縣界地理志云東安陽縣屬代郡

章素侈

心不服其弟所立主父又使田不禮相章也李兌謂肥

義曰公子章彊壯而志驕黨衆而欲大殆有私乎田不

禮之為人，也忍殺而驕。二人相得，必有謀。陰賊起，一出身微幸。夫小人有欲，輕慮淺謀，徒見其利而不顧其害。同類相推，俱入禍門。以吾觀之，必不久矣。子任重而勢大，亂之所始，禍之所集也。子必先患。仁者愛萬物而智者備禍於未形，不仁不智，何以為國？子奚不稱疾毋出，傳政於公子成，毋為怨府，毋為禍梯。肥義曰：不可。昔者主父以王屬義也，曰：毋變而度，毋異而慮，堅守一心，以歿而世義。再拜受命而籍之。今畏不禮之難而忘吾籍。

變孰大焉進受嚴命退而不全負孰甚焉變負之臣不

容於刑諺曰死者復生生者不愧

正義肥義報李兌云必盡傅何為王不可

懼章及田不禮而生異心使死者復更變生并見在生者並見傅王無變令我不愧之若荀息也

吾言

已在前矣吾欲全吾言安得全吾身且夫貞臣也難至而節見忠臣也累至而行明子則有賜而忠我矣雖然吾有語在前者也終不敢失李兌曰諾子勉之矣吾見子已今年耳涕泣而出李兌數見公子成以備田不禮之事異日肥義謂信期曰

索隱即下文高信也正義上音申也

公子與田

不禮甚可憂也其於義也聲善而實惡此為人也不予
不臣吾聞之也姦臣在朝國之殘也讒臣在中主之蠹
也此人貪而欲大內得主而外為暴矯令為慢以擅一
旦之命不難為也禍且逮國今吾憂之夜而忘寐飢而
忘食盜賊出入不可不備自今以來若有召王者必見
吾面我將先以身當之無故而王乃入信期曰善哉吾
得聞此也四年朝羣臣安陽君亦來朝主父令王聽朝
而自從旁觀窺羣臣宗室之禮見其長子章儼然也反

北面為臣，誅於其弟，心憐之。於是乃欲分趙而王章於

代，計未決而輟。主父及王游沙丘，異宮。

正義在邢州平鄉縣東北二十

里也公子章即以其徒與田不禮作亂，詐以主父令召王

肥義先入殺之。高信即與王戰，公子成與李兌自國至

乃起四邑之兵入距，難殺公子章及田不禮，滅其黨賊

而定王室。公子成為相，號安平君。李兌為司寇，公子章

之敗往走主父。主父開之。

索隱開謂開門而納之，俗本亦作聞者非也。譙周及孔衍

皆作開之，閉謂藏也。正義謂不責其反叛之罪，容其入宮閉藏也。

成兌因圍主父宮，公

子章死公子成李兑謀曰以章故圍主父即解兵吾屬

夷矣乃遂圍主父令宮中人後出者夷宮中人悉出主

父欲出不得又不得食探爵斝而食之

集解綦母邃曰斝爵子也索隱

生受哺者謂之斝

三月餘而餓死沙丘宮

集解應劭曰武靈王葬代郡靈丘縣

主

父定死乃發喪赴諸侯是時王少成兌專政畏誅故圍

主父主父初以長子章為太子後得吳娃愛之為不出

者數歲生子何乃廢太子章而立何為王吳娃死愛弛

憐故太子欲兩王之猶豫未決故亂起以至父子俱死

為天下笑豈不痛乎

集解徐廣曰或無此十四字

主父死惠文王立

立五年與燕鄭易

集解徐廣曰皆屬涿郡鄭音莫

八年城南行唐

集解徐廣

曰在常山正義行寒庚反括地志云行唐縣屬冀州為南行唐築城

九年趙梁將與齊合

軍攻韓至魯闕下及

正義劉伯莊云蓋在南陽魯陽闕按汝州魯山縣古穀陽城

十

年秦自置為西帝十一年董叔與魏氏伐宋得河陽於

魏秦取梗陽

集解杜預曰太原晉陽縣南梗陽城也索隱地理志云太原榆次有梗陽鄉與杜預

所據小別也正義括地志云梗陽故城在并州清源縣南百二十步分晉陽縣置本漢榆次縣地春秋晉大夫

祁氏邑也

十二年趙梁將攻齊十三年韓徐為將攻齊公主

死索隱蓋吳娃女

十四年相國樂毅將趙秦韓魏燕攻

齊取靈邱

索隱年表及韓魏等系家五國攻齊在明年然此下文十五年重擊齊是此文為得蓋此

年同伐齊耳正義靈邱蔚州縣也

與秦會中陽

正義括地志中陽故城在汾州偃城縣南漢中陽縣

也

十五年燕昭王來見趙與韓魏秦共擊齊齊王敗走

燕獨深入取臨菑十六年秦復與趙數擊齊齊人患之

蘇厲為齊遺趙王書曰臣聞古之賢君其德行非布於

海內也教順非洽於民人也祭祀時享非數常於鬼神

也甘露降時雨至年穀豐熟民不疾疫衆人善之然而

賢主圖之今足下之賢行功力非數加於秦也怨毒積怒非素深於齊也秦趙與國以彊徵兵於韓秦誠愛趙乎其實憎齊乎物之甚者賢主察之秦非愛趙而憎齊也欲亡韓而吞二周故以齊餞天下恐事之不合故出兵以劫魏趙恐天下畏已也故出質以為信恐天下亟反也故徵兵於韓以威之聲以德與國而實伐空韓索隱與國趙也秦趙今為與國秦徵兵於韓臣以秦計為必共趙伐齊以威聲和趙是以德與國也

出於此夫物固有勢異而患同者楚久伐而中山亡今

齊久伐而韓必亡破齊王與六國分其利也亡韓秦獨

擅之收二周西取祭器秦獨私之賦田計功王之獲利

孰與秦多說士之計曰韓亡三川正義河南之魏亡晉地兩川之間

國正義河北之市朝未變而禍已及矣燕盡齊之北地地安邑河內

去沙邱鉅鹿歛三百里正義沙邱邢州也鉅鹿冀州也

滅韓之後燕之南界秦之東界韓之上黨去邯鄲百里相去滅三百里趙國在中間也

燕秦謀王之河山間三百里而通矣秦之上郡正義廊

也近挺闕至於榆中者千五百里秦以三郡攻王之上

黨

正義秦上黨郡今澤潞儀沁等四州之地兼相州之半韓摠有之至七國時趙得儀沁二州之地韓猶有

潞州及澤州之半半屬趙魏沁州在羊腸坂之西儀并代三州在勾注山之南秦以三郡攻趙之澤潞則勾注

之南趙無地然秦始皇置上黨郡此言之者太史公却引前書也他皆倣此 羊腸之西 正義太行

山坂道名南屬懷州北屬澤州 勾注之南 正義勾注山在代州西北也 非王有已踰

句注斬常山而守之三百里而通於燕代馬胡犬不東

下 正義言秦踰句注山斬常山而守之西北代馬胡犬不東入沙州崑山之玉亦不出至趙矣郭璞云胡地

野犬似狐而小 昆山之玉不出此三寶者亦非王有已王久伐

齊從彊秦攻韓其禍必至於此願王熟慮之且齊之所

以伐者以事王也

正義以趙王為事也而秦必伐之也

天下屬行以謀王

也

正義上音燭下胡郎反言秦欲令齊稱帝與約五國共滅趙三分趙地

燕秦之約成而

兵出有日矣五國三分王之地

正義謂秦齊韓魏燕三分趙之地也

齊倍

五國之約而殉王之患

正義齊王以身從趙王之患也

西兵以禁彊秦

秦廢帝請服

正義言秦齊相約欲重稱帝故言廢帝也

反高平根柔於魏

集解徐廣曰紀年云魏襄王四年改河陽曰河雍向曰高平也根柔一作攬柔一作平柔正義返還也括地志

云高平故城在懷州河陽縣西四十里紀年云魏哀王改向日高平也根柔未詳兩邑魏地也

反壘分

集解徐廣曰一作王公壘音胡鼎反

先俞於趙

集解徐廣曰隔雅曰西俞鴈門是也正義壘音邢分

字誤當作山字括地志云句注山一名西陘山在代州
鴈門縣西北四十里俞音戊郭注云西陘即鴈門山也

按西先聲相近蓋陘山西陘二山
之地並在代州鴈門縣皆趙地也
齊之事王宜為上佼

索隱佼猶行也而今乃抵臯正義謂共秦伐齊也臣恐天下後事王者之

不敢自必也願王熟計之也今王母與天下攻齊天下

必以王為義齊抱社稷而厚事王天下必盡重王義王

以天下善秦秦暴王以天下禁之是一世之名寵制於

王也於是趙乃輟謝秦不擊齊王與燕王遇廉頗將攻

齊昔陽正義括地志云昔陽故城一名陽城在并州樂平縣東春秋釋地名云昔陽肥國所都也樂平

城沾縣東昔陽城肥國白狄別種也樂平縣城漢沾縣城也取之十七年樂毅將趙

師攻魏伯陽正義括地志云伯陽故城一名邯會城在相州鄴縣西五十五里七國時魏邑漢邯

會城而秦怨趙不與已擊齊伐趙拔我兩城十八年秦拔

我石城正義地理志云右北平有石城縣括地志云石城在相州林慮縣西南九十里疑相州石城是

王再之衛東陽決河水正義括地志云東陽故城在貝州歷亭縣界按東陽先屬衛今

屬趙河歷貝州南東北流過河南岸即魏地也故言王再之衛東陽伐魏氏也伐魏氏大潦漳

水出魏再來相趙十九年秦敗我二城趙與魏伯陽趙

奢將攻齊麥邱取之二十年廉頗將攻齊王與秦昭王

遇西河外

集解徐廣曰年表云與秦會涇池

二十一年趙徙漳水武平

西

正義括地志云武平亭今名渭城在瀛州文安縣北七十二里按二十七年又徙漳水武平南

二十

二年大疫置公子丹為太子二十三年樓昌將攻魏幾

正義音祈傳云伐齊幾拔之又戰國策云秦敗閻與不
及攻魏幾按幾邑或屬齊或屬魏當在相潞之間也不

能取十二月廉頗將攻幾取之二十四年廉頗將攻魏

房子

集解徐廣曰屬常山

拔之因城而還又攻安陽取之二十五

年燕周將攻昌

集解徐廣曰屬齊郡索隱燕周趙人為趙將正義括地志云故昌城在淄州淄

川縣東北四十里也

城高唐取之與魏共擊秦秦將白起破我華

陽正義括地志云故華陽城在鄭州管城縣南四十里
司馬彪云華陽亭在今洛州密縣是時魏韓趙聚兵

於華陽得一將軍二十六年取東胡正義今歐代地索

蓋東胡叛趙驅畧代地西攻秦二十七年徙漳水武平南封趙

豹為平陽君集解駟案戰國策曰趙河水出大潦二十

八年蘭相如伐齊至平邑正義括地志云平邑故城在

罷城北九門大城正義恒州燕將成安君公孫操弒其

王集解徐廣曰年表云是燕武成王二十九年秦韓相

攻而圍關與正義上於連反下音預括地志云關與聚

里又儀州順和縣城亦云韓闕與邑二所未詳趙使趙

奢將擊秦大破秦軍闕與下賜號為馬服君正義因馬服山為號

也虞喜志林云馬兵之首也號曰馬服者言能服馬也括地志云馬服山邯鄲縣西北十里也三十三

年惠文王卒太子丹立是為孝成王孝成王元年集解徐廣

曰平原君相也秦伐我拔三城趙王新立太后用事秦急攻之

趙氏求救於齊齊曰必以長安君正義長安君者以長安善故名也為

質兵乃出索隱孔衍云長安君惠文后之少子也趙亦有長安今其地關太后不肯大

臣彊諫太后明謂左右曰復言長安君為質者老婦必

唾其面左師觸龍言願見太后太后盛氣而胥之入

集解

駟案胥猶湏也穀梁傳曰胥其出也

徐趨而坐自謝曰老臣病足曾不能

疾走不得見久矣竊自恕而恐太后體之有所苦也故

願望見太后太后曰老婦恃輦而行

索隱東晉云趙惠文王子何者吳廣

之甥娃羸之子也如系家計之則武靈王十六年夢吳娃而納之至二十七年王薨及惠文王三十二年卒孝

成王元年遣長安君質於齊若娃年二十八王宮至此在六十左側亦可稱老矣而東廣微言太后纔三十有

奇者誤也曰食得毋衰乎曰恃粥耳曰老臣間者殊不欲食

乃彊步日三四里少益嗜食和於身也太後曰老婦不

能太后不和之色少解左師公曰老臣賤息舒祺最少不肖而臣哀竊憐愛之願得補黑衣之缺以衛王宮昧死以聞太后曰敬諾年幾何矣對曰十五歲矣雖少願及未填溝壑而託之太后曰丈夫亦愛憐少子乎對曰甚於婦人太后笑曰婦人異甚對曰老臣竊以為媪之愛燕后賢於長安君太后曰君過矣不若長安君之甚左師公曰父母愛子則為之計深遠媪之送燕后也持其踵為之泣念其遠也亦哀之矣已行非不思也祭祀

則祝之曰必勿使反豈非計長久為子孫相繼為王也哉太后曰然左師公曰今三世以前至於趙主之子孫為侯者其繼有在者乎曰無有曰微獨趙諸侯有在者乎曰老婦不聞也曰此其近者禍及其身遠者及其子孫豈人主之子侯則不善哉位尊而無功奉厚而無勞而挾重器多也今媼尊長安君之位而封之以膏腴之地多與之重器而不及今令有功於國一旦山陵崩長安君何以自託於趙老臣以媼為長安君之計短也故

以為愛之不若燕后太后曰諾恣君之所使之於是為

長安君約車百乘質於齊齊兵乃出子義聞之

索隱子義趙之

賢人曰人主之子骨肉之親也猶不能持無功之尊無勞

之奉而守金玉之重也而況於子乎齊安平君

正義括地志云

安平城在青州臨淄縣東十九里古紀之鄰邑也

田單將趙師而攻燕中陽

正義

燕無中陽括地志云中山故城一名中人亭在定州唐縣東北四十一里爾時屬燕國也

拔之又攻

韓注人

正義邑名也括地志云注城在汝州梁縣西十五里蓋是其地也

拔之二年惠

文后卒田單為相四年王夢衣偏褰之衣

正義杜預曰偏左右異色

袷在中左右異故曰
偏按袷衣背縫也

乘飛龍上天不至而墜見金玉之

積如山明日王召筮史敢占之曰夢衣偏袷之衣者殘也乘飛龍上天不至而墜者有氣而無實也見金玉之積如山者憂也後三日韓氏上黨守馮亭使者至曰韓不能守上黨入之於秦其吏民皆安為趙不欲為秦有城市邑十七願再拜入之趙聽王所以賜吏民王大喜召平陽君豹告之曰馮亭入城市邑十七受之何如對曰聖人甚禍無故之利王曰人懷吾德何謂無故乎對

曰夫秦蠶食韓氏地中絕不令相通固自以為坐而受
上黨之地也韓氏所以不入於秦者欲嫁其禍於趙也
秦服其勞而趙受其利雖彊大不能得之於小弱小弱
顧能得之於彊大乎豈可謂非無故之利哉且夫秦以

牛田之

集解徐廣曰一無之字正義秦蠶食韓氏國中斷不通夫牛耕田種穀至秋則收之成熟之義

也言秦伐韓上黨勝有日矣若牛田之必冀其收穫矣

水通糧

正義秦從渭水漕糧東入河洛軍擊

韓上黨也蠶食上乘倍戰者

正義乘承證反蠶食桑葉漸進必盡也司馬法云百畝為夫夫

三為屋屋三為井井十為通通十為成成出草車一乘七十二人也上乘天下第一也倍戰力攻也韓國四戰

之地軍士慣習倍於餘國裂上國之地其政行不可與為難必勿受

也

正義上國秦地也言韓上黨之地以列為秦國之地其政已行趙不可與秦作難必莫受馮亭十七邑也

王曰今發百萬之軍而攻踰年歷歲未得一城也今以

城市邑十七幣吾國此大利也

正義馮亭將十七邑入趙若幣帛之見遺此大

利也趙豹出王召平原君與趙禹而告之對曰發百萬之

軍而攻踰歲未得一城今坐受城市邑十七此大利不

可失也王曰善乃令趙勝受地告馮亭曰敝國使者臣

勝敝國君使勝致命以萬戶都三封太守

正義爾時未合言太守至

漢景帝始加太守此言太行字也

千戶都三封縣令皆世世為侯吏民

皆益爵三級吏民能相安皆賜之六金馮亭垂涕不見

使者曰吾不處三不義也為主守地不能死固不義一

矣入之秦不聽主令不義二矣賣主地而食之不義三

矣趙遂發兵取上黨

集解駟案漢書馮奉世傳曰趙封馮亭為華陵君與趙將括距秦戰

死於長平宗族由是分散或在趙在趙者為官師將官師將子為代相及秦滅六國而馮亭之後馮無擇馮去疾馮劫皆為秦將相馮興馮唐即代相之子也上黨記云馮亭家在壺關城西五里

廉頗將軍

軍長平

正義括地志云長平故城在澤州高平縣西二十一里即白起敗括於長平處

七年廉

頗免而趙括代將秦人圍趙括趙括以軍降卒四十餘

萬皆阬之王悔不聽趙豹之計故有長平之禍焉王還

不聽秦秦圍邯鄲

集解徐廣曰在九年

武垣令

集解徐廣曰河間有武垣縣本屬涿

郡正義括地志云武垣故城今瀛州城是也

傅豹王容蘇射率燕衆反燕地

正義武垣此時屬趙與燕接境故云率燕衆反燕地也

趙以靈邱

正義括地志云靈邱蔚州理縣

也封楚相春申君八年平原君如楚請救還楚來救及

魏公子無忌亦來救

正義魏公子傳云趙王以鄙為公子湯沐邑年表云九年公子無忌

救邯鄲圍在九年其文錯誤耳

秦圍邯鄲乃解十年燕攻昌壯

集解徐廣曰一

作社正義壯字誤當作城括地志云昌城故城在冀州信都縣西北五里此時屬趙故攻之也

五月拔

之趙將樂乘慶舍攻秦信梁軍破之

集解徐廣曰年表云新中軍也索隱

信梁秦將也正義信梁蓋王黈號也秦本紀云昭襄王五十年王黈從唐拔寧新中寧新中更名安陽今相州

理縣也年表云韓魏楚救趙新中軍秦兵罷是也太子死集解徐廣曰是年周赧王卒或者太子云

天子乎索隱趙而秦攻西周拔之徒父祺出索隱徒父趙大夫名

祺十一年城元氏集解地理志常山有元氏縣正義元氏趙州縣縣上原武陽

君鄭安平死集解徐廣曰故秦將降趙也收其地十二年邯鄲燬

集解徐廣曰廡之名音膾也索隱廡積芻藁之處為火所燒也十四年平原君趙勝

死

索隱年表在十五年

十五年以尉文封相國廉頗為信平君

索隱

尉文蓋地名或曰尉官文名謂以尉文所食之地以封廉頗也古文質畧文省耳正義尉文蓋蔚州地也信平

廉頗號也

燕王令丞相栗腹約驩以五百金為趙王酒還歸

報燕王曰趙氏壯者皆死長平其孤未壯可伐也王召

昌國君樂閒而問之對曰趙四戰之國也其民習兵伐

之不可王曰吾以衆伐寡二而伐一可乎對曰不可王

曰吾即以五而伐一可乎對曰不可燕王大怒羣臣皆

以為可燕卒起二軍車二千乘栗腹將而攻鄢卿秦將

而攻代

索隱二人皆燕將姓名

廉頗為趙將破殺栗腹虜卿秦樂

閒

正義三人皆燕將姓也

十六年廉頗圍燕以樂乘為武襄君

正義

襄舉也上也言樂乘功最高也

十七年假相大將武襄君攻燕圍其國

十八年延陵鈞

集解徐廣曰代郡有延陵縣

率師從相國信平君助

魏攻燕秦拔我榆次

集解徐廣曰在太原

三十七城十九年趙與

燕易土

索隱音亦謂與燕換易縣也

以龍兌汾門臨樂與燕

集解徐廣曰龍

兌汾門在北新城方城有臨鄉正義括地志云北新城故城在易州遂城縣西南二十里按遂城西南二十五

里有龍山邢子勵趙記云龍山有四麓各有一穴大如車輪春風出東秋風出西夏風出南冬風出北不相奪

倫按蓋謂龍兑也汾門括地志云易州永樂縣有徐水出廣昌嶺三源奇發同瀉一澗流至北平縣東南歷石

門中俗謂之龍門水經其間奔激南出觸石成井蓋汾字誤也遂城及永樂北新城地也臨樂括地志云臨鄉

故城在幽州同燕以葛武陽平舒與趙集解徐廣曰葛城在高陽平舒

在代郡正義括地志云故葛城又名西河城在瀛州高陽縣西北五十里平舒故城在蔚州靈邱縣北九十三

里二十年秦王政初立秦拔我晉陽二十一年孝成王

卒廉頗將攻繁陽取之集解徐廣曰在頓邱正義括地志云繁陽故城在相州內黃縣

東北二十七里應邱云使樂乘代之廉頗攻樂乘

走廉頗亡入魏子偃立是為悼襄王悼襄王元年大備

集解徐廣曰一作脩正義行大備之禮也魏欲通平邑中年之道不成正義平邑

在魏州昌樂縣東北三十里相州湯陰縣西五十八里
有中年山按中年山之側時二邑皆屬魏欲渡黃河作

道相通遂二年李牧將攻燕拔武遂方城集解徐廣曰武遂屬安平

正義括地志云易州遂城戰國時武遂城也方城故在
幽州固安縣南十七里時二邑屬燕趙使李牧拔之也

秦召春平君因而留之泄鈞正義人姓名也為之謂文信侯曰

春平君者趙王甚愛之而郎中妬之故相與謀曰春平

君入秦秦必留之故相與計而內之秦也今君留之是

絕趙而郎中之計中也君不如遣春平君而留平都正義

括地志云平都縣在新興郡與陽周縣相近

春平君者言行信於王王必厚

割趙而贖平都文信侯曰善因遣之

集解徐廣曰年表云太子從質秦歸

正義按太子即春平君也

城韓臯三年龐煖將攻燕禽其將劇辛四

年龐煖將趙楚魏燕之銳師攻秦蕞

集解徐廣曰在新豐

不拔移

攻徐取饒安

集解徐廣曰在渤海又云饒屬北海安屬平原正義饒安滄州縣也七國時屬齊戰

國時屬趙

五年傅抵

正義上音付下音邱趙將姓名

將居平邑慶舍將東陽

正義屬貝州在河北岸

河外師守河梁

正義河外河南岸魏州地也河梁橋也

六年

封長安君以饒

正義即饒陽故城漢縣也明長安縣是號也

魏與趙鄴九年趙攻燕取狸陽城

正義按燕無狸陽疑狸字誤當作漁陽故

城在檀州密雲縣南十八里燕漁陽郡城也按趙東界至瀛州則檀州在北趙攻燕取漁陽城也

兵未

罷秦攻鄴拔之

集解徐廣曰今饒陽在河間又年表曰拔關與鄴九城

悼襄王卒

子幽繆王遷立幽繆王遷元年

集解徐廣曰又云潘王世本云孝成王丹生悼

襄王偃偃生今王遷年表及史考趙遷皆無諡索隱徐廣云王遷無諡今唯此獨稱幽繆王者蓋秦滅趙之後

人臣竊追諡之太史公或別有所見而記也

城柏人二年秦攻武城

集解徐廣曰年

表云秦敗我平陽

扈輒率師救之軍敗死馬三年秦攻赤麗宜

安正義括地志云宜安故城在恒州豪城縣西南二十里也

李牧率師與戰肥下却

之

正義括地志云肥累故城在恒州橐城縣西七里春秋時肥子國白狄別種也

封牧為武安

君四年秦攻番吾

正義上音婆又音盤又作蒲括地志云蒲吾城在恒州房山縣東二十里

也

李牧與之戰却之五年代地大動自樂徐以西

集解徐廣

曰樂徐一作除

北至平陰

正義樂徐在晉州平陰在汾也

臺屋墻垣大半壞地

圯東西百三十步

正義其圯溝見在亦在晉汾二州界也

六年大饑民謠

言曰趙為號秦為笑以為不信視地之生毛七年秦人

攻趙趙大將李牧將軍司馬尚將擊之李牧誅司馬尚

免趙忽及齊將顏聚代之趙忽軍破顏聚亡去以王遷

降

正義淮南子云趙王遷流於房陵思故鄉則為作山木之謳聞之者莫不隕涕括地志云趙王遷墓在房

州房陵縣西九里也

八年十月邯鄲為秦

太史公曰吾聞馮王孫曰趙王遷其母倡也

集解徐廣曰列女傳

曰邯鄲之倡

嬖於悼襄王悼襄王廢適子嘉而立遷遷素無

行信讒故誅其良將李牧用郭開豈不謬哉秦既虜遷

趙之亡大夫共立嘉為王王代六歲秦進兵破嘉遂滅

趙以為郡

索隱述贊曰趙氏之世與秦同祖周穆平徐乃封造父帶始事晉風初有土岸賈矯誅韓厥立武寶符臨

代卒居伯魯簡夢翟犬靈歌處女胡服
雖彊建立非所頗收不用王遷囚虜

史記卷四十三

史記卷四十三考證

趙世家見西王母樂之忘歸索隱或曰地名在西域有

何據乎○

臣照

按爾雅觚竹北戶西王母日下謂之

四荒烏得謂無據乎

居原任國政索隱今鴈門原平縣也○原平監本作平

原考後漢書地理志改正

殺趙朔趙同趙括趙嬰齊○容齋隨筆曰春秋於魯成
公八年書晉殺趙同趙括於十年書晉景公卒相去

二年而史記乃有屠岸賈欲滅趙氏程嬰公孫杵臼
共匿趙孤十五年景公復立趙氏之說以年世考之
則自同括死後景公又卒厲公立八年而弒悼公公
立又五年矣其乖妄如是嬰杵臼之事乃戰國俠士
刺客所為春秋時風俗無此也困學紀聞曰左傳正
義曰藥書將下軍則於時朔已死矣不得與同括俱
死也晉君明諸臣強無容有屠岸賈輒廁其間如此
專恣呂成公云史記失於傳聞之差是時晉室正盛

而云索莊姬子於宮中晉宮中自有紀綱不容如此
趙朔已亡而云與同括同時死以二者考之見其誤
趙朔妻成公姊有遺腹○考要曰同括死時已有趙武
無遺腹之說又事出莊姬不關岸賈未知史遷何據
更立襄公曾孫周集解徐廣曰年表云襄公孫也索隱
晉系家云襄公少子名周○晉世家云悼公周者其
大父捷襄公少子也與此同與索隱不符年表亦脫
曾字與此異

嬴姓將大敗周人於范魁之西正義取衛都鄙○監本訛作衛取都鄙今改正

吾有所見子晰也索隱簡子見當道者乃寤曰嘻是故吾前夢所見者知其名曰子晰也○徐孚遠曰吾見子晰者蓋言夢中見子甚明白也不謂其人名晰

簡子曰奏之○簡監本訛作節今改正

晉定公之十四年范中行作亂○余有丁曰范中行氏因邯鄲午而作亂其說見下此先言之誤

陰令宰人各以料擊殺代王及從官集解徐廣曰一作

雜

○臣照

按徐孚遠曰本文各字蓋言殺代王及其

從官各用銅料擊之也徐廣曰一作雜則以雜為宰
人名也今按徐廣說是蓋以料擊殺代王者猶真劍
魚中之類代王既死其從官之被殺固不必問其用
何器矣寧有令庖人盡持料以為戰具之理耶

唯高共集解徐廣曰一作赫○韓非子及淮南人間訓
作高赫呂氏春秋作高赦

敗齊于靈邱集解地理志曰代郡有靈邱縣○余有丁
曰此靈邱齊地非代郡之靈邱

命乎命乎曾無我嬴○列女傳作命兮命兮逢天時而
生曾莫我嬴嬴

十八年秦武王與孟說舉龍文赤鼎絕臚而死○按年
表在十九年

寵有孝悌長幼順明之節○戰國策作窮有辭讓之節
禹袒裸國○按戰國策云禹袒入裸國

王緜○戰國策作王孫緜

兄弟之通義也集解徐廣曰兄弟一作元夷元始也夷平也○戰國策作先王

吾國東有河薄洛之水集解徐廣曰安平經縣西有漳水津名薄洛津○按秦藩本此下有正義按安平縣屬定州也共八字

仇液之韓○戰國策作仇赫

二十五年惠后卒索隱謂武靈王之后前太子章之母

惠文王之嫡母也。惠后卒後，吳娃始當正室。至孝成二年，稱惠文后卒是也。而下文又云：吳娃死後，娃子何寵衰故。太子欲兩王之是誤也。○卮林曰：子長既云是為惠后，又云二十七年立王子，何為王是為惠文王？惠文王，惠后吳娃子也。又云：吳娃死後，子何寵衰反覆著明，則此二十五年卒者，其為孟姚無疑。不得以為子章母也。若惠文后卒者是惠文之后，故稱惠文后耳。自春秋夫人及歷代帝王妃后諡，皆從夫。

或別自易諱未有從其子諡者而獨子何之母仍子
徽稱歷考古今未聞斯典

主父死惠文王立○徐孚遠曰主父已傳位與子此云
惠文王立誤也

怨毒積怒非素深於齊也○戰國策作怨毒積惡非曾
深陵於韓也

且齊之所以伐者以事王也正義以趙王為事也而秦
必伐之也○徐孚遠曰此注不明蓋言齊之所以見

惡於天下者以其服事趙也故下云齊倍約而殉王之患為齊解於趙語

反高平根柔於魏反丕分先俞於趙○戰國策作反溫軹高平於魏反三公什清於趙

左師觸龍言願見太后○

臣照

按說苑桀臣有左師觸

龍荀子議兵篇微子開封于宋曹觸龍斷於軍觸龍古有是名戰國策作觸讐并下言字作一字蓋誤也老婦恃輦而行索隱東晉云趙惠文王子何者吳廣之

甥娃嬴之子也如系家計之則武靈王十六年夢吳娃而納之至二十七年王薨及惠文王三十二年卒孝成王元年遣長安君質於齊若娃年二十八王宮至此在六十左側亦可稱老矣而東廣微言太后纔三十有奇者誤也○卮林曰以惠文后為吳娃則長安君主父之子也至是時已三四十歲矣尚需其母愛憐之乎吳娃以主父十六年入宮子何之生應在十七年則二十七年惠文為王已得齡十一二矣惠

文王三十三矣上去東宮時十二年下至孝成元年
合得四十六年使王后長于惠文理亦有之即與惠
文並歲亦已望五十矣素問女子六七面皆焦髮始
白七七形壞無子何得不稱老婦以此而觀廣徵謂
三十有奇果未為得也

有城市邑十七○戰國策作七十

七年廉頗免而趙括代將秦人圍趙括趙括以軍降卒
四十餘萬皆阬之○按年表阬卒在六年

虜卿秦樂間○徐孚遠曰樂間以諫燕王不聽自歸趙
非戰敗被虜也

秦召春平君○戰國策作春平侯

君不如遣春平君而留平都○戰國策平都下有侯字
吾聞馮王孫曰○馮唐傳云唐子遂字王孫與余善

史記卷四十三考證